

乾隆歷城縣志

歷城縣志卷第三十六

列傳二

金

范巽濟南人劉豫僭號時為侍郎豫以什一稅民名為古法其實剝斂而刑法嚴急吏賣緣為暴民久罹兵革益窮困陷罪者衆巽極言其弊請仍因履畝之法豫不

從巽坐貶官弟拱

據金史  
范拱傳

拱字清叔九歲能屬文深於易學宋末登進士第調廣濟軍曹權邦彥辟為書記攝學事劉豫鎮東拱撰謁廟文豫奇之深加賞識拱獻六箴齊國建累擢中書舍人

上初政錄十五篇一曰得民二曰命將三曰簡禮四曰  
納諫五曰遠圖六曰治亂七曰舉賢八曰守令九曰延  
問十曰畏慎十一曰節祥瑞十二曰戒雷同十三曰用  
人十四曰御將十五曰御軍豫納其說而不能盡用也  
久之權尚書右丞進左丞兼門下侍郎豫重斂民財而  
刑法嚴急境內苦之拱兄巽及右丞相張孝純請革其  
弊豫不從巽坐貶官自是無復敢言者拱曰吾言之則  
為黨兄不言則百姓困弊吾執政也寧為百姓言之乃  
上疏其大畧以為國家懲亡宋重斂弊什一稅民本務  
優恤官吏奉行太急驅民犯禁非長久計也豫雖未即

從而亦不加譴拱令刑部條上諸路以稅抵罪者凡千餘人豫見其多乃更為五等稅法民猶以為重也齊廢梁王宋弼領行臺省事拱為官屬宋弼訪求百姓利病拱以減稅為請宋弼從之減舊三分之一民始蘇息拱慎許可而推轂士李南張輔劉長言皆拱薦也長言自汝州剡城酒監擢省郎人不知其所以進拱亦不自言以久病乞近郡除淄州刺史皇統四年引疾求退以通議大夫致仕齋居讀書罕對妻子世宗在濟南聞其名大定初拱上封事七年召赴闕除太常卿議郊祀或有言前代都長安及汴洛以太華等山列為五岳今既都

燕當別議五岳名寺僚取高高疏周都鄴鎬以吳嶽為  
西岳拱以為非是議畧曰軒轅在上谷在恒山之西舜  
居蒲坂在華山之北以此言之未嘗據所都而改岳祀  
也後遂不改拱嘗言禮官當守禮法官當守法若漢張  
釋之可謂能守法矣故其議論確然不可移奪九年復  
致仕卒於家年七十四

據金史  
本傳

董積躬字師道濟南人大德中舉進士歷縣尹知海州  
羣盜出沒積躬峻城郭嚴斥堠盜不入境尋規措京兆  
府三白渠事至日以便民為已任凡所灌溉均得其利  
累官山東東路轉運都勾判官兼提舉學校事

舊志

按山東通志董積躬墓在青城縣西北二十里而  
舊志載入人物不知果是縣人否又金曰縣令不  
曰尹年號有天德無大德未敢擅改姑記以俟考  
趙摯興濟南人明昌五年以德行才能為本路所舉詔  
特賜同進士出身

見金史章宗本紀

元

張榮字世輝濟南歷城人父衍以急人之難稱於鄉里  
榮狀貌奇偉嘗從軍為流矢貫背拔之不出令人以足  
抵其額而拔之神色自若金季山東羣盜蜂起榮率鄉  
民據濟南贊堂嶺眾稍盛遂畧章邱鄒平濟陽長山辛

市蒲臺新城及淄川之地而有之兵至則清野入山歲  
丙戌東平順天皆內屬榮遂舉其兵與地納款於按亦  
台那衍引見太祖問以孤軍數載獨抗王師之故對曰  
山東地廣人稠悉為帝有臣若但有倚恃亦不款服太  
祖壯之拊其背曰正賽因八都兒也授金紫光祿大夫  
山東行尚書省兼兵馬都元帥知濟南府事時貿易用  
銀民爭發墓劫取榮下令禁絕庚寅朝廷集諸侯議取  
汴榮請先六軍以清蹕道帝嘉之賜衣三襲詔位諸侯  
上辛卯軍至河上榮率死士宵濟守者潰詰旦敵兵整  
陣至榮馳之望風披靡奪戰船五十艘麾抵北岸濟師

眾軍繼進乘勝破張盤二山寨俘獲萬餘大將阿木魯  
恐生變欲盡殺之榮力爭而止癸巳汴梁下從阿木魯  
為先鋒攻睢陽議欲殺俘虜烹其油以灌城又力止之  
既而城下榮單騎入城撫其民甲午攻沛沛拒守稍嚴  
其將唆蛾夜來擣營榮覺之唆蛾返走率將士追殺之  
乘勝急攻城破就攻徐州守將國用安引兵突出榮逆  
擊之亦破其城用安赴水死乙未拔邳州丙申從諸王  
濶端破宋棗陽仇城等縣時河南民北徙至濟南榮下  
令民間分屋與地居之俾得樹畜且課其毀最曠野闢  
為樂土是歲中書考績為天下第一李璫據益都私餽



以馬蹄金榮曰身既許國何可擅交鄰境却之年六十  
一乞致仕後十九年世祖即位封濟南公致仕卒年八  
十三贈推忠宣力正義佐命功臣太師開府儀同三司  
上柱國追封濟南王諡忠襄子七人長邦傑襲爵勤於  
撫字凡可以裕民生植邦基者力陳於上賦之病民者  
數請蠲貸皆報可且以新造金虎符與金織幣服賜之  
而民或不堪賦及不得請至均為代輸之流民以歸疲  
瘵以蘇事集而人不擾朝廷考課為天下最乃割河間  
之將陵臨邑等六處以旌治績仍升將陵為州初以質  
子侍王藩娶呵可亦正氏生子宏而卒邦直行軍萬戶

邦彥權濟南行省邦允知淄州邦孚大都督府郎中邦  
昌與魯總管邦憲淮安路總管孫四十人宏襲邦傑爵  
據元史本傳及張宏  
行狀張宏神道碑

按新城縣志張貴字國寶歷城人官般陽軍節度  
金季山東豪傑角立貴實為甲乙是時行省張林  
約為弟兄以兄榮為腹心以貴為爪牙蓋據貴之  
父忠墓碑以為傳而其云歷城人則因歷城別有  
張榮而誤與貴兄合為一人也明萬歷間鄭獨復  
作新城舊事已辨其非一人王漁洋分甘餘話嘗  
采之新城志作於分甘餘話以前或未見鄭說耶

忠墓碑為鄉貢進士劉贊作在新城之于家堤予  
遣人椎拓視之碑云張氏高苑成良里人蓋其地  
在金元屬高苑益知與忠襄無涉也今府志及山  
東通志皆相沿以貴為歷城人恐有以予為遺漏  
者故辨之忠襄諡法及封王皆元史所不載今從  
寔碑增入寔碑云榮父衍又證其非新城之張榮  
也

宏字可大幼巖然如成人長博通諸國語及嗣為政以  
繼述為心屬大旱徒步四十里禱雨龍洞既奠而雨霑  
足在軍旅拊循士卒號令嚴明累奏戰功於襄陽二州

世祖在王邸伐宋宏為前鋒得生口輒詢山川地形途  
所從出城郭向背主將誰某倉儲守兵幾何一一陳之  
且逆畫進取之策既捷卒如其言上甚褒嘉拔木藥山  
寨獲男女萬餘人咸釋之至陽羅堡請以四百艘先濟  
江奪大船名白鷄者一大戰江中連勝偏將以二百艘  
抵南岸宋師奔潰而宏之北斗旗已樹矣上整軍渡江  
至鄂州宏先諸軍攻城東南登其陴連戰陷之上命籍  
府庫秋毫無所私師旋部徙降民數千於內地嬰孺無  
失有疾者給以醫藥上即位下詔褒宏能繼祖父功俾  
帶虎符授濟南府行軍萬戶管民總管凡在所屬並聽

節制中統三年春李璫叛自益都率兵數擣濟南先是  
宏條璫逆跡十事且言平章王文統故璫叅佐中外連  
構可慮亟宜罷文統而擇人代璫又因上獵密奏上諭  
近侍毋泄至是璫叛城守之卒數不滿千宏遂偕其祖  
濟南公榮告變京師半道詔以諸王合必赤總兵擊之  
集郡縣兵討賊以宏為前導而璫已據濟南諸道兵既  
合乃築城周六十里圍之璫不得出宏率卒青齊境上  
斷其餉道攻下寨柵脅從之民皆歸正賊數突圍宏遁  
却之以功遷大都督秋七月璫伏誅宏言濟南民無罪  
軍士不得入城肆虜掠於是王遣將分掌門鑰有卒褫

民婦衣斬以徇諸軍肅然至元初創遷正定路總管兼  
府尹加鎮國上將軍有故吏掇拾宏諸父罪辭連宏上  
以其有功特原之而免所居官九年王師次襄陽起宏  
為懷遠大將軍新軍萬戶佩金虎符宋安撫呂文煥守  
襄陽攻之不下諭之不從文煥曰得張濟南一言吾無  
盟矣宏特詔往諭即舉城降十年授襄陽等處統軍使  
總兵十七萬人十三年宋平宏悉歸功諸將以積勞致  
疾堅乞骸骨以歸宏生遼東兀魯回河又二女為藩王  
妃樂其風土遂留居間歲一至濟南優游暇豫以佚其  
老二十四年十一月卒於濟南私第年五十九宏累世

有善政時論東諸侯尚忠厚崇信義而不奪民力惟濟南為然宏之遷正定民傾城攀留西郭外俯伏羅拜擁馬不得行宏諭解久之方出郊民望哭聲震原野為樹碑頌德及被新軍萬戶之命過家省其祖民皆郊迎子二人元節襲宏爵宣武將軍征西萬戶嘗為征西元帥府薦充副都元帥國家有大慶齊恩數與諸王等張起嚴稱其忠勤廉正鎮禦有方總戎遙征威惠兼濟元里被吳王教建昌路達魯花赤宏孫那懷襲征西萬戶宏事不見於史而起嚴為作行狀語頗詳故據以為傳

據元

宓字淵仲邦憲子也邦憲史但載為淮安路總管而宓  
碑謂贈宣忠秉義功臣中奉大夫河南江北行中書省  
叅知政事護軍追封濟南郡公諡貞毅宓幼以質子入  
侍武宗潛邸賜名蒙古台武宗立授尚沐奉御嘗見便  
殿命陳古聖人可法者宓曰臣家濟南帝舜廟在焉舜  
聖人也因陳舜豫親數事且曰帝王之德莫大於孝上  
嘉納後山東以蝗旱聞命宓走舜廟致禱訖事而兩蝗  
則盡死還奏稱旨錫金織衣一襲仁宗即位選知滕州  
陞辭賜海東青鷹以寵之滕有昆弟訟財者公喻以天  
倫之重民友睦如初杖豪強柄持官府為治梗者闔境



肅然麥一莖秀至三四穗州人歌之治遂最諸郡入為  
度支監丞出知南陽府未行轉兵馬司都指揮使豫討  
帖實赤斤帖木兒逆黨遷彰德路總管蠲逋賦罷運費  
境中舊多盜必令村各置鼓盜發則擊鄰村相應亦擊  
盜驚駭皆遁去天歷初擢山北廉訪副使改保定時明  
宗在北服京師空虛西軍猝至紫荆關戍卒不支而潰  
入保定界肆剽劫邑居之民衆聚為城守計得潰卒無  
良者因槌斃之知樞密院事也先尼駐軍城外五里給  
府同知及縣尉與居民百餘人至軍責以擅殺盡戮之  
血淋漓被道復下令屠城民詢詢思不靖必時以病在

告即昇疾冒白刃突至帳下也先尼怒愈張蹕公於前  
詔曰女欲反乎從容曰我病不與知府事已久軍士不  
能拒敵而潰還虐良民此法所不赦民初不辨誰何倉  
卒誤格之至死樞密已刑百餘人償之矣復欲屠城城  
中戶不下萬餘萬一激生他變咎復誰任我寧以身代  
民死樞密其勿恐民必辭直氣和也先尼默然為少沮  
殺數人解圍而去命必諭民以不殺故民間必來歡聲  
如雷手額以更生相賀除逃民賦倍彰德調正定移平  
江平江積訟牒七百餘既下車剖析畧盡請罷平江杭  
州集慶提舉司衆賴少蘇順帝元統二年召為吏部尚

書明年拜嶺北行省叅知政事皆善於其職以病歸至  
正三年起為山東東西道宣慰使山東食鹽為民害密  
請復行鹽法以便民益都路增油稅至四千五百定羨  
十倍下令禁止三路十三州民訟久不決者公督攝之  
六閱月分命有司決絕三千一百八十四事未及引年  
乞致仕歸濟南卒年六十六贈中奉大夫江浙等處行  
中書省叅知政事護軍追封濟南郡公諡宣懿子元輔  
以廢授忠顯校尉奉元路務提領選松江財賦司副提

舉孫樞

據李國鳳張  
公神道碑

張可與濟南人陶宗儀稱其律身廉正持法公平有可

以納忠於國者雖斧鉞有所不避為中書郎中日先帝  
時一大姦以元惡受顯戮後二子黃緣入侍各授行省  
平章陞驛叩首言曰先臣在九原弗獲露一命之榮當  
不瞑目臣敢昧死請上命左右傳旨中書獨可與不奉  
詔越數日上召丞相面諭之丞相退謂可與曰聖意寵  
遇之深當復奈何可與曰朝廷果欲舉行贈典必須雪  
其非罪若然則先帝不合誅之以先帝為何如主哉則  
上之於先帝反不若大姦之有後矣不孝孰大焉丞相  
備述以聞上為動容而止嘗以病在告都堂有人訴宗  
室謀逆奏送刑部問狀逮鞠有證驗而死於獄宗室之

妻見上泣曰臣妾夫某無罪枉死上但知送部而不謂其已死遂怒命御史臺鞠問丞相懼謀之可與即扶疾至省取牘補署花押衆皆愕然丞相曰恐掾史所行有錯欲照畧耳非謂此也可與曰自丞相以下皆當聽問某何獨求免邪既而緘牘令該掾抱詣臺臺官首問曰張郎中曾書卷否曰然臺官議曰張郎中所行未嘗差錯况此一事中書得旨施行執法者復何罪因覆奏曰臣等取省案根勘宗室某之死不枉上領之其事遂寢

南村報  
耕錄

按張可與疑即宏宓之兄弟惜佚其名九成書此

事在順帝時所謂先帝蓋文宗也

劉伯林濟南人好任俠善騎射金末為威寧防城千戶  
壬申歲太祖圍威寧伯林知不能敵乃縋城詣軍門請  
降太祖許之遣禿魯花等與偕入城遂以城降常問伯  
林在金國為何官對曰都提控即以元職授之命選士  
卒為一軍與太傅耶律禿懷同征討招降山後諸州太  
祖北還留伯林屯天成遇金兵前後數十戰進攻西京  
錄功賜金虎符以本職充西京留守兼兵馬副元帥癸  
酉從征山東攻梁門遂城下之乙亥同國王木華黎攻  
破燕京丁丑復從大軍攻下山東諸州木華黎上其功

賜名馬二十匹錦衣一襲戊寅同攻下太原平陽己卯  
破潞絳及火山間喜諸州縣時論欲徙聞喜民實天成  
伯林以北地喪亂人艱於食力爭而止之部曲所獲俘  
虜萬計悉縱之在威寧十餘年務農積穀與民休息隣  
境凋瘵而威寧獨為樂土嘗曰吾聞活千人者後必封  
吾之所活何啻萬餘人子孫必有興者乎辛巳以疾卒  
年七十二累贈太師封秦國公諡忠順子黑馬

黑馬名彝字孟方始生時家有白馬產黑駒故以為小  
字後遂以小字行驍勇有志畧年幾弱冠隨父征伐大  
小數百戰出入行陣畧無懼色嘗獨行遇金兵圍本部

十三人即奮劍入圍手殺金兵數人十三人皆得賜歲  
壬午襲父職為萬戶佩虎符兼都元帥癸未從國王木  
華黎攻鳳翔不克回屯絳州又從孛羅攻西夏唐兀甲  
申從按正那衍攻破東平大名乙酉金降將武僊據正  
定以叛從孛羅討之破正定武僊遁去金將忽察虎以  
兵四十萬復取山後諸州黑馬逆戰隘胡嶺大破之斬  
忽察虎歲己丑太祖即位始立三萬戶以黑馬為首重  
喜史天澤次之授金虎符充管把平陽宣德等路管軍  
萬戶仍僉太傅府事統管漢軍從征回回河西諸國及  
破鳳翔西河汧州諸城堡庚寅睿宗入自大散關假道



於宋以伐金命黑馬先由興元金房東下至三峯山遇  
金大將合達與戰大敗之虜合達斬首數萬級乘勝攻  
破香山寨及釣州賜西錦良馬貂鼠衣以旌其功會增  
立七萬戶仍以黑馬為首重喜史天澤嚴實等次之癸  
巳從破南京賜繡衣玉帶甲午從破蔡州滅金乙未同  
都元帥答海紺卜征西川辛丑改授都總管萬戶統西  
京河東陝西諸軍萬戶夾谷忙古反田雄等並聽節制  
入覲帝憊勞之賜銀鼠皮三百為直孫衣尋命巡撫天  
下察民利病應州郭志全反脅從誣誤者五百餘人有  
司議盡戮之黑馬止誅其為首者數人餘悉從輕典癸

丑從憲宗至六盤山商州與宋接境數為所侵命黑馬  
守之宋人斂兵不敢犯丁巳入覲請立成都以圖全蜀  
帝從之成都既立就命管領新舊軍民大小諸務賜號  
也可禿立中統元年廉希憲商挺宣撫川陝時密力火  
者握重兵居成都希憲與挺慮其為變以黑馬有膽智  
使乘驛矯詔竟誅之其子訴於朝世祖諭之曰茲朕命  
也其勿復言三年命兼成都路軍民經畧使瀘州被圍  
黑馬已屬疾猶親督轉輸不輟左右諫其少休黑馬曰  
國事方急以此死無憾遂卒年六十三累贈太傅封秦  
國公諡忠惠子十二人元振元禮顯

元振字仲舉黑馬長子也隨父入蜀立成都會商鄧間有警命黑馬往鎮商鄧以元振攝萬戶時年方二十既蒞事號令嚴明賞罰不妄麾下宿將皆敬服之憲宗伐宋跬蹕釣魚山以元振與紐鄰為先鋒中統元年世祖即位廉希憲商挺奏以為成都經畧使總管萬戶宋瀘州守將劉整密送款求降黑馬遣元振往受之諸將皆曰劉整無故而降不可信也元振曰宋權臣當國賞罰無章有功者徃徃以計除之是以將士離心且整本非南人而居瀘南重地事勢與李全何異整此舉無可疑者遂行黑馬戒之曰劉整宋之名將瀘乃蜀之衝要今

整遽以瀘降情偽不可知汝無為一身慮事成則為國家之利不成則當效死乃其分也元振至瀘整開門出迎元振棄衆而先下馬與整相見示以不疑明日請入城元振釋戎服從數騎與整聯轡而入飲燕至醉整心服馬獻金六千兩男女五百人元振以金分賜將士而歸還其男女宋瀘州主帥俞興率兵圍瀘州晝夜急攻自正月至五月城幾陷左右勸元振曰事勢如此宜思變通整本非吾人與俱死無益也元振曰人以誠歸我既受其降豈可以急而棄之且瀘之得失關國家利害吾有死而已食將盡殺所乘馬犒將士募善游者賫蠟

書至成都求援又權造金銀牌分賞有功未幾援兵至  
元振與整出城合擊興兵大敗之斬其都統一人興退  
走旋聞且自陳擅造金銀牌罪帝嘉其通於權變賜錦  
衣一襲白金五百兩入朝又賜黃金五十兩弓矢鞍轡  
黑馬卒元振居喪起授成都軍民經畧使至元七年時  
議以勲舊之家事權太重宜稍裁抑遂降為成都副萬  
戶十一年命兼潼川路副招討使十二年卒年五十一  
子緯數從父行軍元振卒緯襲職佩虎符為萬戶守潼  
川創立遂寧諸處山寨從圍釣魚山數戰有功攻合州  
授潼川路副招討遷副都元帥復授管軍萬戶遷同知

四川西道宣慰司事入朝進四川西道宣慰使拜陝西  
行省叅知政事卒

元禮黑馬第五子也性渾厚有謀嘗從父在軍中歲甲  
寅授金符為京北路奧魯萬戶中統四年遷興元成都  
等路兵馬左副元帥至元元年遷潼川路漢軍都元帥  
二年九月宋制置夏貴率軍五萬犯潼川元禮所領纔  
數千衆寡不敵諸將登城望貴軍有懼色元禮曰料敵  
制勝在智不在力乃出戰屢破之復大戰蓬溪自寅至  
未勝負不決激厲將士曰此去城百里為敵所乘則城  
不可得入潼川非國家有矣丈夫當以死戰取功名時

不可失也即持長刃大呼突入陣所向披靡將士咸奮  
無一不當百大敗貴兵斬首萬餘級生擒千餘人捷奏  
賜錦衣二襲白金三錠名馬一匹金鞍轡弓矢召入朝  
命復還潼川立蓬溪寨元禮又奏嘉定去成都三百六  
十里其間舊有眉州城可修復之屯兵以扼嘉定往來  
之路世祖從之四年命平章趙寶臣往視可否或以為  
眉州荒廢已久立之無開利害徒費財力元禮力爭之  
寶臣是其言遂興役七日而畢宋人駭其速元禮鎮守  
眉州五年召入朝乞解官養母從之九年起授懷遠大

將軍延安路總管卒

元史  
本傳

張仁其先衆強人自高祖遷於縣東唐家道口遂占籍  
焉父萬嘗為濟南帥府提控軍民仁資稟英烈善騎射  
事濟南張侯擢五軍都鎮撫兼領歷城縣軍民事後隨  
元帥察罕征江淮攻安豐久不下仁選銳卒十四人乘  
昏晦登城奮戈大呼餘軍繼集遂陷其城察罕嘉其勇  
以拔突呼之賜銀盃許金帳內索食副帥納忽又賜白  
金二錠仁散金給士卒及還張侯復使領歷城軍民事  
食采四戶年且老請以子信嗣任信以連海把軍百夫  
長隨世祖攻鄂州遇大礮中右股而還遂以弟佺代復  
授百夫長守把邳州以山東亂還里佺弟進以中統三



年隨都督張公廵防益都破長峪道攻謝水棚有功至  
元元年以沂郯萬戶孟某舉薦授副千人長兼管四城  
兵馬事以病歸使弟巨源繼其職巨源曰吾兄弟五人  
有職者四吾樂聖賢之道不願仕也乃以從兄儀代

據李

吉張仁  
神道碑

儀仁之弟義子也義嘗攝歷城縣事為防箭千戶儀弱  
冠以廕為百夫長遣戍沂郯至元十年國兵南征以帥  
府命城正陽先期竣工尋以六安當南北之交使儀戍  
馬宋平詔賜馬千餘匹置驛安慶以通江淮時儀守烏  
金驛宋故將遮所賜馬盡驅以去儀率所部追於驛南

殊死戰大殪其衆生擒數十人盡復其馬送至大竹園  
復遇寇戰走之卒致馬而還歷戍正陽安慶壽春泗滁  
所至以才勇聞二十六年用帥府薦加授進義副尉元  
貞元年卒於軍年七十子守忠嘗隨儀習戰陣嗣百夫

長

據劉敏中張  
儀神道碑

張炤字彥明濟南人父信以商賈起家貲雄於鄉壬辰  
歲饑出粟賑貸鄉人賴以全活炤幼穎悟力學始補史  
濟南上計壽陽行省有積年勾考未輸銀十萬五千兩  
炤條陳利害切至遂獲免徵民得無擾中統元年辟為  
中書省掾俄遷右司提控案牘四年出為山東東路大

都督府員外郎至元四年轉陝西五路西蜀四川行中書省左右司員外郎八年進階奉訓大夫知兗州事時州境亢旱吏民懇禱不雨炤始至甘雨霑足聞屬邑有黠吏挾官府肆為暴橫炤繩之以法杖出境外民害遂息十一年改授淮西等路行中書省左右司郎中丞相阿塔海領軍進攻瓜州鎮江炤運糧儲給戰具凡二年贊畫之力居多十三年揚州未下丞相阿木提兵攻之五月宋將李庭芝棄城遁泰州炤領兵迫揚州城下躬往詔諭制置朱煥以城降庭芝亦就擒炤傳檄未下州郡皆望風款附從阿木入覲世祖賜錦衣鞍勒十三年

陞大中大夫揚州路總管府達魯花赤商議行中書省  
事仰金虎符時行省在揚州據南北要津炤撫綏勞來  
上下安之十六年改鎮江路總管府達魯花赤謝病歸  
購書八萬卷以萬卷送濟南府學資教育二十一年起  
為東昌路總管蒞政二年吏民畏服以治最稱二十五  
年卒年六十四延祐五年贈大中大夫東昌路總管進  
封清河郡侯諡敬惠子用中沂州山場同提舉元史本傳  
張均濟南人父山見忠烈傳均襲百戶從親王塔察兒  
攻鄂州面中流矢中統三年從征李璫有功以總帥命  
陞千戶領兵守淄州至元六年從左丞董文炳攻宋五

河口轉戰濠州北遇其伏兵均率衆力戰敗之十年攻連州奪孫村堡十二年賜金符授忠翊校尉沂郟翼千戶從攻蕪湖奪宋戰船俘四十餘人又從丞相阿塔海戰有功加武畧將軍十四年賜虎符加宣武將軍二十二年陞松江萬戶二十四年從鎮南王征交趾二十六年從北征擢明威將軍前衛親軍副都指揮使三十年世祖親征乃顏以扈從受賞成宗即位命屯田和林規畫備悉有法諸王藥木忽兒北征給餉賴之未嘗乏絕帝嘉其能賜予有加大德元年改和林等處副元帥歷宣慰司同知陞都元帥加鎮國上將軍延祐元年卒子

世忠襲前衛親軍副都指揮使

據元史本傳

秦津世為歷城人其墓碑云胡國公叔寶之後而其世不可次高祖崇曾祖昌皆業農祖德父寶嘗出資濟人津有勇力年十六七會天下方亂學騎射里中小人多從之貞祐中金主遷汴梁河朔不守從行尚書省張公興畧定濟南授歷城縣軍民提控頗見親厚歲丁亥以廉從犯罪相連率統軍走東平東平行尚書省嚴實素知津署歷城縣令兼本軍提控隸兵馬總管趙完璧帳下其冬十一月從完璧取彰德進攻太行李合寨功在諸校先壬辰正月以行尚書省命提步卒千人渡河攻

蓋岡捷之別招老幼萬餘人牛羊馬萬數還駐曹州地  
界魯汴兵經者二十年城郭盡為瓦礫津督老幼構盛  
舍若將久居者實過而見之謂可守即使領州事十二  
月金兵由間道取衛州濟自黃陵岡同知蘇山潛納之  
且謀殺津津夜奔求援東平得精兵千餘生擒其副使  
李進等十七人復保曹州金兵不能至衛回走歸德會  
國兵有肆者津訴主將將以為津罪械繫大名獄時嚴  
實方北上遽命出之津乃詣闕訟其事竟抵主將罪因  
正授曹州長官居十六年遷德州防禦使二年復還曹  
州刺史歲餘又改德州前後典郡二十年提兵數千里

多活蹟子四人世勻世傑世英世顯時又有武畧將軍

泰安州倉使秦忠者蓋其弟云

據宋貞泰氏先塋碑

孫慶字伯善世為濟南人父榮有隱德慶資稟性厚金貞祐之亂嚴實壁青崖山慶挈家依之以對問當其意得隸帳下凡所戰攻慶皆從焉實據東平宋將大名彭義斌悉衆圍實實乃與連合義斌拜慶為長強之而西慶密遣騎告難於元之大帥大帥率數千騎來援與義斌遇於贊皇西山慶獻計於實曰援兵既至我當入北軍以張其勢成敗在此舉幾不可失也慶馳赴之將士皆殊死鬪大名軍遂潰擒義斌故地盡復實承制封拜



授慶忠武校尉濟南府軍資庫使改行尚書省應辦使  
歲壬辰遷武畧將軍威捷軍都指揮使兼巡捕事再加  
宣武將軍己亥遷本路鎮撫軍民副彈壓兼行東平府  
錄事慶蒞事嚴明有能聲然性剛直與時多忤卒罷去  
及寶子忠濟為行臺念其為寶舊人復都指揮使及巡  
捕事未幾以疾告而忠濟使其子天益代往慶篤於交  
誼與充人劉德潤潞人閻載之相厚善德潤仕行臺詳  
議官貧甚病且死泣為慶言曾大父以來未葬身後獨  
一老嫗在安能辦此慶慨然任其事德潤沒為之送終  
并葬其三世載之失侯故將沒後家貧子幼無以葬慶

經紀其喪威儀繁縟祖祭填塞與時貴無異人以此稱  
之慶年五十七卒子天益天瑞天寵孫德安翁安壽安  
世安承安

據元好問  
孫君墓碑

按元遺山所作墓碑但言從先相光祿公而不言  
姓氏以元史考之知為嚴實無疑又所云告難於  
國兵大帥疑即字里海也其墓在長清縣黃山例  
不得載入古蹟

姜或字文卿其先萊陽人父椿避亂依濟南張榮因家  
焉或幼穎悟好學榮守濟南辟為掾陞左右司知事尋  
遷郎中進叅議官中統三年或與榮孫宏入朝因言益

都李璵反狀已露宜先其未發制之未報明年春璵果反時諸郡不為兵併璵即襲據濟南或棄家從榮招集散亡迎諸王哈必赤進兵討之秋七月捕得生口言城中糧盡勢蹙或乃昏夜請見王曰聞王陛辭時面受詔曰發兵誅璵耳毋及無辜今旦夕城且破王宜早諭諸將分守城門勿令縱兵不然城中無噍類矣王曰汝言城破解陰陽耶或曰以人事知之若待城破言於王晚矣王悟明日賊衆開門出降王下令諸軍敢入城者論以軍法璵就擒城中按堵如故或以功授大都督府叅議改知濱州時行營軍士多占民田為牧地縱牛馬壞

民禾稼桑棗或言於中書遣官分畫疆畔捕其強猾不法者置之法乃課民種桑歲餘新桑徧野人名為太守桑及遷東平府判官民遮請留馬為之不行至元五年召拜治書侍御史出為河北河南道提刑按察使賜金虎符改信州路總管後累遷陝西漢中河東山西道提刑按察使拜行臺御史中丞後以老病歸濟南尋擢燕南河北道提刑按察使三十年二月以疾卒年七十六

子迪吉

元史本傳

劉斌濟南歷城縣人少孤鞠於大父有勇力從濟南張榮起兵為管軍千戶歲壬辰攻河南以功授中翼都統

攻睢陽軍軍否堆距陳州七十里聞陳整軍於近郊斌率衆夜破之又擊走太康守兵擒其將三日太康陷榮言於帥阿木魯曰太康之平推其鋒者斌也移屯襄陽軍乏食斌知青陵多積穀前阻大澤水深不可涉陳可取狀衆難之斌叱之曰彼恃險不我虞取可必也乃率百騎夜發獲敵人使道之前行汙澤中五十餘里遇敵兵斌捨馬揮鎗突敵敗之得其糧數千斛遷官知中外諸軍事從攻六安先登破其城癸卯擢濟南推官辛亥授本道左副元帥乙卯陞濟南新舊軍萬戶移鎮邳州宋將憚之己未病謂其子曰居官當廉正自守毋黷貨

以喪身敗家語畢而逝年六十有二贈中奉大夫叅知政事護軍彭城郡公諡武莊子思敬

思敬賜名哈八兒都襲父職為征行千戶世祖南征從董文炳攻臺山寨先登中流矢傷甚帝親勞賜酒易金符中統二年授武衛軍千戶從討李璫賜銀六十錠四年授濟南武衛軍總管捕盜有功又賜銀千兩至元三年授懷遠大將軍侍衛親軍左翼副都指揮使四年命築京城八年授廣威將軍西川副統軍佩金虎符九年宋嘉定守臣咎萬壽乘虛攻成都哈八兒都邀擊敗之戰於青城宋兵大敗奪所俘二千人還十二年轉同簽

行樞密院事復攻嘉定取之瀘叙忠活諸部及巴縣等  
勝龜雲石筍等寨十九族及西南夷五十六部悉來降  
十三年圍重慶敗宋將張萬得其舟百餘六月瀘州復  
叛哈八兒都妻子沒焉乃率兵討擒其將任慶攻破盤  
山寨俘九千餘戶又獲其將劉雄及王世昌等夜入東  
門巷戰殺王安撫等遂克瀘州復攻重慶其將趙牛子  
降擒守臣張珏十六年蜀平拜中奉大夫四川行省叅  
知政事行省罷改四川北道宣慰使十七年授正奉大  
夫江西行省叅知政事治吉贛盜民賴以安二十年卒  
年五十三贈推忠宣力果毅功臣平章政事柱國封瀕

國公諡忠肅子思恭字安道累官昭毅大將軍右衛親  
軍都指揮使思義宣武將軍昌國州軍民達魯花赤

元史

本傳

趙文昌字明叔號西臯濟南人由諸生歷事臺省至元  
癸丑出為長清縣尹歷官監察御史同知福建道宣慰  
司事文章政事當時推為一代宗師其尹長清也於簿  
書期會奔趨督責之餘務以德義牖民期月政吏訟簡  
乃敞廟學為數畝宮名樂育堂治學舍聚經史立教條  
率儒生屬吏日講授其中雖造次多故未嘗少輟由是  
人才輩出弦誦之風為他邑最迄數十年不衰

按至元  
丁丑王



惲泰安州長清縣樂育堂記陳文彦跋及後至元戊寅成此重修樂育堂記二碑

按陸通志又云趙文昌元世祖時知長清縣有惠政嘗建三皇廟集歷代醫書令人習之以祛民疾後擢行臺侍御史

孟德濟南人國初由鄒平縣令淄州節度使累官至同知濟南路事太宗即位之八年諸王濶端命德為元帥佩金符領濟南軍攻宋徐州光州降其衆而有其地歲中辰定宗母六皇后稱制大王按只台以德為萬戶攻濠蘄黃等州積有戰功憲宗即位之三年命德守睢州五年移守海州宋安撫呂文德以兵擾邊德敗之俘其

太尉劉海丁巳從伯顏攻襄樊己未與子義從世  
鄂州先登中統三年從征李璫璫平德以老告歸義  
為萬戶領兵守沂郟四年賜虎符至元元年城郟六年  
從山東統軍帖赤如五河宋軍拒南岸義率兵渡河擊  
之凡數戰有功九年授懷遠大將軍遷宿州萬戶十一  
年宋制置夏貴攻正陽義奪戰艦數艘遂敗之十二年  
掠地至安慶等處攻揚子橋獲功十三年三月改守杭  
州九月從下福建溫台等處十四年四月授招勇大將  
軍瑞州路達魯花赤十月徙鎮閩州十六年授招勇大  
將軍招討使二十二年復為沂郟萬戶元貞元年以老

辭職子智襲職授三珠虎符宣武將軍為萬戶延祐二

年進明威將軍以病去職子安世襲

元史本傳

富德庸濟南人至元二十五年宰慈谿抑豪強清狂

氏樂畊桑土興孝弟慈湖書院山長曹漢炎作碑頌之

成化四明郡志

張傑字漢臣世家濟南為於潛縣令至元乙未賊起安

吉東抵縣境傑以義結民為伍乘法修門隍理器械立

旗色號凡若干伍傑中令今日與民共死生若輩偷生

令以伍乘法殺若輩吾偷生若輩亦以伍乘法殺令即

夜統衆二千人跡賊所往殺其魁及從十人賊望風奔

潰明年賊又自徽突抵昌化昌化去縣治僅三十里居民皆荷擔謀徙傑饋牛酒呼民復以伍乘法矢如初賊素聞傑名皆遁去縣訖安堵如故仍調鄉夫守禦四門晝理縣事夜巡縣境以為常夏四月淫雨三麥盡稔而腐傑疏請岳祠痛自責者三而天大霽見楊維禎張令

禦寇碑

浙江通志

劉事義字伯宜世為濟南人家傳清白性剛直好義能詩文蚤歲由都省東曹知官差除掾遷大都酒使司提舉職滿出知禹城縣縣為曹州理所地濶民殷首以五事自勉異時繇賦皆取決鄉吏手上下推移貴賤易位

大為民害事義乃勸丁力畜產列為等差咸稱平允縣  
舊多曠土事義力勸課循行阡陌見田父多方誨慰民  
由是感悟以樹藝為急三年中植雜木二十四萬餘株  
勤勘牒訟決遣無遺遇親屬相爭者以恩義反復開諭  
率感服自求解去建社學八十區為擇師以教之額外  
佐吏皆資遣入學為生員仍率僚屬朔望會集講明義  
理敦勸後進風俗為之一變縣當衝要去州治幾六百  
里凡督責期會事皆辦集而民不病境內生嘉禾一莖  
九穗表進於朝去任日縣人結綵街市持酒肴鳴鼓吹  
出郭十餘里攀泣拜別以不得借留為恨越二年為大

德二年張翼為撰去思碑

據禹城縣志

按事義舊志作吉義山東通志又謫士義今據碑

### 文改正

趙野字子開濟南人大德初為沛縣尹勸學興農政平

訟理

江南通志

高芝字國瑞濟南人大德五年知新州清操挺然愛民

禮士惠鰥寡修學校嘗於驛路栽松竹以便行者

郝玉麟廣

東通志

武秀濟南人仁宗時以清譽擢蒙陰令經制有方規畫有法興學校勸農桑在蒙數年民愛戴如父母遷山東

東路都轉運使史乘紀蒙令之賢者必以秀為首云祀

名宦

據陸通志及蒙陰縣志

高仁字壽之濟南人延祐初知吳江州時行省賑杭饑命吳江增糶三萬石仁抗言州小數已溢不可增監運使虧課省委仁取諸民補之仁言民貧不可妄動動且有外虞事並寢

南畿志

張如砥字周道歷城人延祐初知上海縣潔已愛民有民負寺僧租適嬰兒病死遂訟僧索租毆死如砥曰不毆爾而毆嬰兒詐也叱使去丙辰秋浙西大水壞禾稼行省詰縣徵賦如常如砥力爭得減

上海縣志

李綱字文晦濟南人泰定中以汝寧府判守濟州有善政先是下令境內曰民毋犯法吏毋舞法百爾執事毋曠厥職業乃條孝弟忠信禮義廉恥之事為勸民直言令民誦之俾知所向背尤嚴於捕盜曰欲民安先去民之不安者盜有為他縣獲者訊之云濟守捕急因竄此廣學舍四十楹暇則躬課諸生旌勤懲惰彌久無倦色歲蝗捐俸市牲酒禱之蝗不為災歲旱禱於天引咎自責天為雨遂大稔河決都水監發山東民塞焉死者枕籍道路濟民裹糧將行綱控廉訪司獨留之民懽呼載道他如奏免飼馬治刁陽湖為田闢祭田供祭費公私



使之當時麥有一莖四三穗者僉謂絅誠愛所致郡人  
白守信作瑞麥圖頌焉監察御史李嗣宗等舉之於朝  
曰愛民如子馭吏若神尋陞福建閩海道廉訪副使後  
卒於任城館舍濟人於其在官也戴之若父母於其去  
也老幼奔走遮留之於其卒也遠近悲慟相與登太白  
樓招之以衣元編修觀音奴撰遺愛碑具載始末

據廖有恒

濟寧州志

張養浩字希孟濟南人幼有行義嘗出遇人有遺楮幣  
於塗者其人已去追而還之年方十歲讀書不輟父母  
憂其過勤而止之養浩晝則默誦夜則閉戶張燈竊讀

山東按察使焦遂明之薦為東平學正游京師獻書於  
平章不忽木大奇之辟為禮部令史仍薦入御史臺又  
為丞相掾選授堂邑縣尹人言官舍不利居無免者竟  
居之首毀濶祠三十餘所罷舊盜之朔望叅者皆感泣  
為良民李虎者常殺人其黨恭戾害民養浩盡置諸法  
去官十年民猶為立碑頌德仁宗在東宮召為司經未  
至改文學拜監察御史初議立尚書省養浩言其不便  
既立又言變法亂政將禍天下臺臣抑而不聞乃揚言  
曰昔桑哥用事臺臣不言後幾不免今御史既言又不  
以聞臺將安用時武宗將親祀南郊不豫遣大臣代祀

風忽大起人多凍死養浩於祀所揚言曰代祀非人故  
天示之變大違時相意時省臣奏用臺臣養浩嘆曰尉  
專捕盜縱不稱職使盜自選可乎遂疏時政萬餘言一  
曰賞賜太多二曰刑禁太疎三曰名爵太輕四曰臺綱  
太弱五曰土木太盛六曰號令太浮七曰倖門太多八  
曰風俗太靡九曰異端太橫十曰取相之術太寬言皆  
切直當國者不能容遂除翰林侍制復搆以罪罷之戒  
省臺勿復用養浩恐及禍乃變姓名遁去尚書省罷始  
召為右司都事在堂邑時其縣達魯花赤嘗與之有隙  
時方求選養浩為白宰相授以美職還翰林直學士改

和書少監延祐初設進士科遂以禮部侍郎知貢舉進士詣謁皆不納但使人戒之曰諸君子但思報效奚勞謝為擢陝西行臺治書侍御史改右司郎中拜禮部尚書英宗即位命參議中書省事會元夕帝欲於內庭張燈為鰲山上䟽切諫帝大怒既覽而喜曰非張希孟不敢言即罷之賜尚服幣帛以旌其直後以父老棄官歸養召為吏部尚書不拜丁父憂未終喪復以吏部尚書召力辭不起泰定元年以太子詹事丞兼經筵說書召又辭改淮東廉訪使進翰林學士皆不赴天歷二年關中大旱饑民相食特拜陝西行臺中丞既聞命即散其

家之所有與鄉里貧乏者登車就道遇餓者則賑之死  
者則葬之道經華山禱雨於嶽祠泣拜不能起天忽陰  
翳一雨二日及到官復禱雨社壇大雨如注水三尺乃  
止禾黍自生秦人大喜時斗米直十三緡民持鈔出糴  
稍昏即不用諸庫換易則豪猾黨蔽易十與五累日不  
可得民大困乃檢庫中未毀昏鈔文可驗者得一千八  
十五萬五千餘緡悉以印記其背又刻十貫五貫為券  
給散貧乏命米商視印出糴諸庫驗數以易之於是吏  
弊不敢行又率富民出粟因上章請行納粟補官之令  
聞民間有殺子以奉母者為之大恟出私錢以濟之到

官四月未嘗家居止宿公署夜禱於天晝則出賑饑民  
每撫膺痛哭遂得疾卒年六十關中之人哀之如失父  
母至順二年贈摠誠宣惠功臣榮祿大夫陝西等處行  
中書省平章政事柱國追封濱國公諡文忠子二彊引

彊先卒

節元史  
本傳

按引官職不見於史而貢師泰等叙三事忠告謂  
引字惟遠至正十五年來僉閩憲克濟世德今七  
聘堂內所刻養浩手書詩詞在十四年引皆有跋  
署云朝請大夫陝西諸道行御史臺監察御史知  
其歷官先秦而後闕也

韓鏞字伯高濟南人延祐五年中進士第授將仕郎翰林國史院編修官尋遷集賢都事泰定四年轉國子博士俄拜監察御史當時由進士入官者僅百之一由吏致位顯要者常十之九帝乃欲以中書叅議傅巖起為吏部尚書鏞上言吏部掌天下銓衡巖起從吏入官烏足盡知天下賢才況尚書秩三品巖起累官四品耳於法亦不得陞制可其奏天歷元年除僉浙西廉訪司事擊姦暴黜貪墨而特舉烏程縣尹干文傳治行為諸縣最所至郡縣為之肅然二年轉江浙財賦副總管至順元年除國子司業尋遷南行臺治書侍御史順帝初歷

僉宣徽及樞密院事至正二年除翰林侍講學士既而  
拜侍御史以剛介為時所忌言事者誣劾其賊私乃罷  
去五年臺臣辨其誣遂復起叅議中書省事七年朝廷  
慎選守令叅知政事魏中立言於帝當今必欲得賢守  
令無加鏞者帝乃特署鏞姓名授饒州路總管饒之為  
俗尚鬼有覺山廟者自昔為妖以禍福人為盜賊者事  
之尤至將為盜必卜之鏞至即撤其祠宇沉土偶人於  
江凡境內淫祠有不合祀典者皆毀之人初大駭已而  
皆嘆服鏞知民可教俾俊秀入學宮求宿儒學行俱尊  
者列為五經師旦望必幅巾深衣以謁先聖月必考訂



課試以示勸勵每治政之暇必延見其師生與之講討  
經義由是人人自力於學而饒之以科第進者視他郡  
為多鏞居官解自奉澹泊僚屬亦皆化之先是朝使至  
外郡者官府奉之甚侈一不厭其所欲即銜之往往騰  
謗於朝其出使於饒者鏞延見郡舍中供以糲飯退皆  
無有後言其後有旨以織幣脆薄遣使督行省臣及諸  
郡長史獨鏞無與鏞治政雖細事具詳密多類此十年  
拜中書叅知政事十一年丞相脫脫在位而龔伯遂輩  
方用事朝廷悉議更張鏞有言不見聽人或以鏞優於  
治郡而執政非其所長遂出為甘肅行省叅知政事及

脫脫罷用事者悉誅而鑄又獨免禍乃遷西行臺中丞

歿於官

元史本傳

陳楚僊歷城人至元間為鄒平尹勤心撫字役均事集境內大治以憂去民詣闕留之上允其請特授奉訓大

夫

舊志

按陳楚僊歷仕在至元間而鄒平縣志謂至正年任故知舊志所稱至元後至元也鄒平志述其舊志有云稱學禮賢不尚苛猛創立縣城祀名宦祠又載張述文創立縣城記云至正十二年八月尹歷下陳彥武命作城十月落成民咸稽首賀又載

焦榮祖伏生書院記云至正十五年尹陳埜先建  
僊先一書互異而彥武蓋其字也

又按埜僊歷仕不可考明史藁太祖紀云元至正  
十五年春正月太祖定計取和州元兵十萬攻和  
民兵元帥陳埜先分屯新塘高望雞籠山以絕餉  
道太祖率衆擊破之六月趨太平陳埜先與其將  
康茂才以數萬衆逼城下太祖遣徐達鄧愈湯和  
逆戰別將潛出其後夾擊之擒埜先降其衆九月  
埜先叛抵漂陽為民兵所殺從子兆先收餘衆屯  
方山十六年春三月太祖進攻集慶擒兆先再敗

元兵以時事考之當即濟南之陳桱先太祖實錄  
載其事尤詳且力詆桱先詭譎要其忠於為元不  
可沒也併錄於此以俟考

孫天民字可達濟南人至正間南康路總管平心治人  
有清節多善政建譙樓修學宮凡學田見侵者悉復之

豫章書

劉時中世家歷城其先君嘗為鄒魯儒官時中自幼隨  
侍不出庠序故於俎豆禮文之事甚習或與之言齊魯  
間事與夫聖賢之世系封爵里居地理山川人物好尚  
如指諸掌問之而無不言聽之而無所倦壯隨侍南寧

以廢得永州東安尉繼為永新州州判安於貧而不求  
勤於事而不忽其斂於民也若不得已其奉乎上者若  
有所不及官無廢事而民咸安之

據李祁雲陽集  
贈劉時中序

按時中不知為名與字亦不知仕元何時其先君  
名字及歷官之詳皆不可考姑附於此

畢文質濟南士族由翊正掾外補昌平縣尹昌平近畿  
劇縣文質性慎重善操簡以御煩皆稱其材敏而廉平  
不苛民樂其業田里安於無事縣有谿水運關關中霖  
潦暴至恒為患文質規貨食募匠傭架石為橋人皆利  
涉而民不知有役

據黃文  
獻公集

歷城縣志卷第三十五終

懷城縣志卷第三十七

列傳三

明

李思迪濟南人登元進士第為國子助教洪武元年以故官入京授起居注六遷至山西行省叅政以事降丹徒知縣坐失入人罪安置閩中十二年正月帝敕中書曰思迪為縣無貪墨其守可嘉偶為姦吏所欺致失入人罪竄居炎方已數年矣可特詔還俾訓國子三月乙未帝延諸儒臣賜坐便殿論治道思迪及馬懿絨默不語帝諭國子監師生曰李思迪馬懿朕以其學者日召

同遊期在嘉言善行啟朕未明而輔朕不足乃終日無  
言旁有講說經史者因而問及不過就他人之辭以對  
豈朕昏昧不足與聞耶抑朕之禮未至耶何訪之以道  
而不相告也及遣侍東宮欲其發明古先王之道匡弼  
輔贊以成其德器而緘默無異事朕之時其懷詐甚矣  
諭爾等自今為師者必盡其師之職學者必盡其學之  
道勿如思廸等之為也後思廸官至尚書

據明太祖實錄及廣東通志

按廣東通志李思廸洪武四年謫瓊山知縣以廉  
謹聞時方草創凡所規畫皆中度革姦貪毀淫祠



祛宿弊芟繁冗政齊大若公餘事詳白苑海濱  
子因以名集官至尚書其所載歷官起居注山西  
叅政與實錄同而實錄云安置關中此云謫瓊山  
知縣不知孰是抑先闕而後嶺南耶志云官尚書  
亦不見於實錄明史七卿年表亦無之

按宋濂集有送李思迪之宮序畧曰晉王開國太  
原詔簡在廷之臣以吏部侍郎李君為之傳命既  
下為士者曰我知李君文且賢也翩翩乎修辭裁  
截乎雅韻春花明而秋雲敷江濤雄而蛟龍鳴出  
其緒餘克推高第遂為甲午科名進士其膺是選

也則宜在位者曰我聞李君賢且能也自來京師  
即膺寵眷居右史有獻替之功佐延安有撫綏之  
績已而召入郎曹直躋法從試之也既屢而用之  
也彌篤其膺是選也則宜金華宋濂則曰是固然  
矣然而皇上之意以晉國表裏河山之固北控代  
朔南接關陝必得重厚誠懇君子輔王而安輯之  
此李君所以在選要不止前二者所云而已也李  
君名吉其字曰思迪濟南人據此則思迪名吉而  
實錄及諸書俱作李思迪其以字行耶

潘原英山東歷城人洪武初任太原縣知縣改築城池

重葺廟學雅善課士當兵戈凋殘之際興賢育才茲

不輟祀名宦

山西通志

秦琰字居敬洪武二十六年領鄉薦累官刑部侍郎以

才行舉重一時

陸通志

周郁濟南人洪武三十一年任襄陵縣知縣持身嚴潔

為政寬宏均賦役平獄訟民爭德之祀名宦永樂間擢

渾源知州時旱蝗郁齋沐虔禱蝗飛出境川南有虎傷

人郁牒於神是夜虎果入籠中後陞荊州知府所在民

有餘思

山西通志

按周郁宦蹟兩見於山西通志蓋從襄陵渾源二

志采之也今合為一傳而舊志不載其姓名不識  
果為縣人否

張思信有勇畧建文二年靖難師圍濟南築隄壅水灌  
城中思信應叅政鐵鉉募闕隧道潰其隄水泄城賴以  
全孫鸞正德六年舉人授長沙通判多異政民為立生  
祠鸞子錦太學生德府引禮舍人錦子潭見儒林傳據

士瞻三山  
先生墓表

趙時中歷城人永樂間知南安府為政廉勤勞於撫字

名聞隣境

明一  
統志

按明一統志不言歷城人而白潢西江志引之如

此

趙紳永樂九年舉人初授監察御史激揚有聲劾尚書金連出為揚州府同知後陞山西叅議轉江西皆卓然有政績以老致仕朝廷念其廉介賜半俸養老

陸通志

按明史金濂傳濂數為御史所劾紳與同時所劾蓋濂也七卿表無所謂尚書金連者應是傳寫之誤而山西通志載此事亦誤作連

薛理永樂二十二年進士授行在戶科給事中宣德初中官驕橫理論劾剴切尋授衡州府知府有惠政嘗捐俸資給士之貧乏者在那數年以疾乞歸

同上

劉純山東歷城縣人正統十年任嵐縣令剛直不阿人

皆稱頌

山西通志

尹宏字克寬世為歷城人溫州府志云宣德二年任溫州府同知先是軍衛縱橫民罹其虐宏一以禮法制之期月帖然亢旱竭誠致禱隨應歲轉大熟以艱去闕書云宏正統中以貢生任泉州知府歷官廉公愛民留心教養在泉撫字益勤旱禱輒雨歲因不荒卒於官泉人號慕如失慈母肖像祠之仍葬其衣冠郡城東立碑頌德歲時致祭塚下

據劉健恭簡尹公神道碑及溫州府志闕書

按舊志尹宏無傳但載其為永樂甲午舉人泉州

府知府而閩書謂由貢生蓋明初太學最重宏以舉人肄業國子監故不稱舉人而稱貢生非誤也其温州同知不知即初任否洛陽劉健作其子旻神道碑有云公之先考贈太保公同知余郡是宏又嘗為河南府同知亦不知其於温州孰為先後也

旻字同仁宏子也少穎異力學舉正統十二年鄉試第一明年成進士改庶吉士景帝立授刑科給事中時國家多故旻建白多正議景泰四年刑部尚書俞士悅以勅建隆福寺啟普度齋請收所梟賊首及枷號罪人以

為宜溥天恩於存亡旻言人臣宅心以正進言以正宅  
心以邪進言以邪進以正則君益聖而治道隆進以邪  
則君日驕而治道替人主不可不辨之於早以審其蔽  
惑士悅心術回邪踪跡詭秘逢迎阿諛以為容悅如欲  
收所梟賊首自宜體皇上好生惡殺之心援古昔孟春  
掩骼埋胔之說何得妄言建寺設齋執左道以亂政如  
欲收枷示罪人自宜舉皇上恤刑之典援古昔仲春省  
囹圄去桎梏之說何得謬言適當普度挾異端以要君  
其不能引君當道輔君以德如此若不早察則其姦邪  
日甚諛佞由此成風異端由此橫流正道由此晦蝕通



者徐州諸處災異迭見言者皆以小人在位正此之類  
誠宜置士悅於法使邪人不容於清朝而將來者有警  
其侍郎周瑄劉清阿順苟從罪亦惟均詔曰士悅等職  
典刑獄心存矜恤所言乃其當然曷何得坐以阿諂其  
置不問天順初遷左給事中奏事殿內帝偉其貌欲大  
用之擢通政叅議陝西用兵命往督餉六年春上言大  
寇已遁而我師八萬餘人日供芻粟悉取之民間且軍  
民轉輸動數百里牛斃車摧道塗嗟怨今東作方興豈  
可捨耒耜供輸輓近聞平涼民漸逃竄倘軍興不息必  
轉為盜邊患未除隱憂方大帝以為然詔邊臣亟畫戰

守旻復條上安邊十策母喪起後擢吏部右侍郎成化五年轉左姚夔卒旻代為尚書欲收物情兼採南北人銓拔無滯賢愚皆悅兩京災異偕文武大臣陳時幣十八事帝多採納汪直開西礮旻潛附之項忠將劾直具奏令郎中姚璧請旻署旻曰疏出兵部即當為首璧曰公九卿長也旻怫然曰今日亦知為九卿長耶強署之而使人報直直遂逐忠與旻交益固帝惑近倖異端曲藝咸中旨授官旻等頻詣左順門候中官宣旨翼日仍依故事覆奏中官亦厭其煩屬母覆且令得官者勿廷謝遂廢舊制十四年加太子少保尋以直言加太子太

保久之又以中旨加太子太傅初旻與劉珣王越深相結又善以智數籠絡人故典銓久謗議不及惟大學士萬安學士彭華深疾旻越珣相繼去旻勢漸孤而方士李孜省貴幸數干旻不能應安與孜省比而傾旻會鄉人兵部郎中鄒襲謫官指揮張旺等奏留之下部議旻請可其奏安孜省遂譖旻落太子太傅仍為太子少保而侍郎耿裕黎淳郎中鄭宏等皆得罪已復詞旻子侍講龍諸陰事下龍詔獄執訊午門多所株連削旻太子少保以尚書致仕旻有才智而急功名素附麗中人至是為安等所逐宏治十八年年八十二卒贈太子太保

諡恭簡子龍字舜臣成化五年進士改翰林院庶吉士授編修未幾轉侍講安喉言官劾其招權納賄逮下詔獄命三法司錦衣衛廷鞫之遂黜為民先旻卒

據實錄及明史

葉

按尹旻明史無傳傳維鱗明書載入姦回傳詆之甚力蓋據尹直瑣綴錄而為之殊非公論惟孝宗實錄稱其在吏部先後二十餘年甄別人物隨才授任各得其職畧無貶語明史葉列傳亦最平允灼艾荆集云旻掌銓衡十八九年選法公平士有定守萬安深嫉之然旻在吏部久公論已定又劉

珣在內閣能持正論及珣以讒罷安引尹直入閣  
託所私道士李孜省諧旻下其子侍講龍於獄令  
旻致仕連及旻鄉故舊皆降謫外補才望如鍾侶  
張海輩亦貶謫吾學編云公選法通敏賢愚皆悅  
當時謠曰公道不如王恕選法不如尹旻蓋旻物  
望之重如此以直瑣綴錄行於世世或有不辨二  
尹邪正者王貽上引月山叢談辨之詳矣龍官侍  
講舊志作侍講學士誤

李森字時茂歷城人天順元年進士授戶科給事中負  
氣敢言憲宗時請禁朝覲官科斂征求為民害者頃之

言爵位天下之公器國家之大柄近有無功而晉侯伯都督者有涼德薄才位九列者有以畫弈彈琴醫卜技能得官職者名爵日輕官方日雜是玩公器棄大柄也自今宜擇人授母令匪才黃緣競進已又請嚴軍官黜陟覈逃伍虛糧多報可四年四月言在京文官三品以上例令子孫一人入監讀書臣以為各官子孫生於貴族鮮克由禮惟知驕傲是尚計以歲月得官若槩將此等入監不無廢學怠志宜停此例帝謂持論刻薄不體朝廷忠厚之意而命自今三品以上官非歷任年久政績顯著者不許濫叙其子七月御史謝文祥以劾姚夔

下獄森偕同官言文祥因劾奏大臣下獄臣於此竊見  
陛下有欲杜絕言路之意夫言路者朝廷之命脉有益  
於世也大矣古之帝王求諫如不及納諫如轉丸猶慮  
善言不至忠言不聞又設敢諫之鼓立誹謗之木無非  
開納諫之門以廣求賢之路也我朝列聖相承咸用此  
道近明詔之頒亦拳拳以求言納諫為言今文祥歷任  
未久恣其愚戇論列過情固宜加罪但原其初意不過  
欲稱厥職而已陛下若因此重譴之則違前日下詔求  
諫之意且恐大臣之中貪暴姦邪阿諛苟容者自慶得  
志大肆姦惡誰敢為陛下言哉疏入不報十月遷本科

右給事中明年夏因災異上言伏見今年六月朔日有食之又聞廣東瓊山縣閏二月中颶風橫發雨雹如斗此皆陽微陰盛之徵上天垂戒之意惟修德圖治克勤天戒則雖有其變而無其應矣臣謹摠一得之愚條陳十事其一曰正心二曰謹學三曰親賢四曰無逸五曰納諫為修德之要六曰重民七曰卹軍八曰用賢九曰選將十曰抑奢為行政之目疏入上嘉納之八月以貴倖侵奪民產率諸給事言昔奉英宗睿皇帝勅諭皇親多有令家人強占軍民田地者事發重罪不宥投獻者悉發邊衛永遠充軍當時貴戚罔敢犯法軍民不至流



亡比者本科給事中邱宏建請不許權貴奏求田地荷  
蒙聖諭今後奏求田地者一切不允中外臣民莫不忻  
忭鼓舞奈何權豪親倖猶復恃恩恣橫不已如錦衣衛  
帶俸指揮同知周或翊聖夫人劉氏屢蒙聖恩給賜田  
地其數不貲今或又求武強武邑二縣地共六百餘頃  
劉氏又求通州武清縣地三百餘頃俱蒙俞允蓋陛下  
念及親親保祐之功不忍拒之曲從所請殊不知其歛  
壑之欲無厭畿內田地有限而小民賦稅衣食皆出於  
此一旦奪之何以爲生且入皇朝以來百年於茲民生  
日衆安得尚有不耕不稼之閒田名曰求討實則強占

也伏望陛下法祖為治出令必行毋以私恩廢公義特  
勅有司仍將給賜二家之地與民為業今後敢有投獻  
者悉發戍邊奏求者許科道官劾奏治以重罪則豪強  
畏法小民被惠宗社之幸也帝善其言而已賜者仍不  
問山西災山東及杭紹嘉湖大水森等請蠲賑帝並從  
之萬貴妃專寵後宮莫得進致帝未有儲嗣言者每勸  
上普恩澤然未敢顯言妃妬也惟森抗章為言帝心愠  
欲假事斥之時森已再遷左給事中會戶科都給事中  
缺吏部列森名上詔予外任部擬興化知府猶不允乃  
出為懷慶通判未幾投劾歸不復出

據憲宗實錄  
及明史集

按題名碑錄森天順元年進士明史葉諤以為六年其奏疏四通從實錄增入而陸通志載其每奏先昇棺於外又言因劾萬貴妃家人謫定州同知未任而卒明史葉云出為懷慶通判投劾歸未知孰是

林瑛歷城人天順間以監生任漳浦知縣當兵燹之後民不聊生頑梗自恣瑛問疾苦休息之犯輒不貸澹薄簡重僚屬清肅

閩書

盧獻字世賢其先來強人自四世祖遷於縣祖盡潔嘗為鄉飲賓獻補諸生從歷城教諭周顥受春秋景泰四

年舉鄉試肄業國子監成化二年授蔚州知州蔚州衛軍士暴劫鄉民獻力禁治民有冤獄累年弗白者獻為直之十年軍民皆化焉丁大父憂服除補宿州六年巡撫張鵬巡按馬進薦其治狀賜羊酒綵幣獎褒忽亦發於背卒年四十九蔚州民有為制服者

按遼寧盛公墓表

趙璿字文璣世為縣人璿由貢生試政都察院有能聲授山西遼州知州以平易治民諸廢具舉九年報最擢河東都轉鹽運使司同知入羨出均課無所訕致仕歸成化十六年年七十卒曾孫繼本

按姚林趙公墓碑

繼本字承德號蒙泉嘉靖十四年進士改翰林院庶吉

士授廣東道監察御史巡按南畿勦賊有功劾論焦繼章高僊貪穢不檢時上欲南狩抗疏止之下獄三日督學北畿選集制藝及唐宋古文類成數帙題曰舉業式程刊布八郡多士翕然嚮風年如千卒官孫天開天啟三年舉人有著述

按世宗實錄及  
舊志載補通志

按繼本諫南狩下獄事見於舊志不識其在何年恐世宗時無此事俟考

鄒襲字繼芳濟南衛人成化二年進士仕南京兵部武選司郎中居官清苦及歸杜門不出三十餘年以詩文自娛士大夫往謁者未嘗干以私鄉人推重之

舊志

劉璵字廷珍濟南衛人成化四年舉鄉試第一明年成進士舊志稱其歷官刑部郎中才識明決折獄稱平而廣東通志云璵由進士歷大理寺丞成化二十三年貶知連州時長吏多務姑息民輕犯法璵懲其弊政教嚴明遠近相戒無敢犯明年遷蘇州府同知其歷仕不可盡知今見於孝宗實錄者宏治十年六月璵以都御史巡撫大同請給守墩官軍之在大邊者月行糧一石二邊者半斗腹裏者三斗從之七月璵上邊備事宜一集十兵大同城兵止望千而各路屯兵數少不足調用乞令府州縣按籍選銳者發附近衛所帶管給與甲仗令

自備鞍馬隨軍操練有功一體陞賞止終本身仍量本  
戶稅糧多少優免人丁一足兵馬大同西路威遠衛皆  
極邊原撥官軍五千操守比來物故數多僅存千六百  
餘人雖調山西民壯千三百人戍守緣秋來春去更代  
不常又多老弱不得實用乞以新募士兵量撥千五百  
名編入本衛操守月支米一石其民壯盡數放免每名  
歲納銀二兩於官類解山西行都司收貯以備買馬之  
用一申舊例往年有召商納馬之令每納馬四匹或銀  
四十兩者給之冠帶以格例太重應令者少乞減損其  
數馬止三匹銀三十兩為便一足戰馬大同各城官軍

騎操馬匹比來死損四千有餘而負商人馬價又亡慮五千餘兩請太僕寺收貯馬價銀買補兵部覆奏謂土兵可招集然不必按籍拘選甲仗及馬皆官給之威遠衛止就召募舍餘數內有願充當一軍者陸續編入足一千五百名而止山西民壯令所司仍選年力精壯者應役馬價令太僕給銀二萬止以買馬不可移以償商人舊負之數其所擬減損納馬納銀格例良是從之時邊商賈私買鐵器璫不為防禁十二年虜陷馬營璫聞警不即調兵遣給事中吳世忠等往按之別用璫大理寺左少卿世忠奏臣前按劉璫罪得旨以璫廢弛邊備



隱匿邊情貽患地方取回別用臣愚以為陛下既知其  
罪必加顯罰而今乃止調大理寺少卿夫去邊方而用  
之在京是遷也非降也且邊方將士所以身冒白刃甘  
心死國者亦由賞罰嚴明有以奔走之耳今鞏敗事如  
此而又遷之則誰肯奉公守法捨生奮勇為陛下捍患  
者哉臣請以軍法議處其罪上曰鞏事既有前旨其置  
之鞏數為給事中所劾訖不得其究竟舊志但云自為  
墓誌著生平勤苦之節而已

據舊志廣東  
通志及實錄

按劉鞏濟南衛籍憲宗實錄成化二年閏三月庚  
子命都指揮劉政子鞏襲父原職乃別是一人鞏

父名文華以璫貴初封刑部廣東司主事再封刑部福建司郎中又贈都察院左僉都御史亦可知璫所歷官也

張鵠字用和其先定州人元末有名敬中者籍於縣敬中生璫永樂間舉人官南京後府經歷鵠祖也父諒府正術鵠登成化十一年進士授襄陵知縣入為御史憲宗末年數箴言官鵠力諫又常劾妖僧繼曉方士鄧常恩等帝心惡之出按江西盜賊多強宗佃僕鵠與巡撫閔珪交奏其事尹直等搆之乃貶珪而坐鵠尹旻黨謫郴州判官宏治初擢河南僉事進叅議以協治黃陵岡

遷副使十五年進按察使鴈官河南久屢遭河患督治有方民為立祠是年秋擢右僉都御史巡撫遼東時軍政久弛又許餘丁納貲助驛遞給冠帶復其身邊人競援例避役鴈言不可因條上定馬制核屯糧清隱占稽客戶減軍伴數事悉允行尋劾分守中官劉恭貪虐罪築邊牆自山海關迄開原遼陽堡凡千餘里遼撫自徐貫後歷張岫張玉陳瑤韓重四人多得罪去至鴈稱能武宗立移撫宣府正德改元召還尋進右副都御史署院事有知縣犯賊常褫職卒殺人當抵死劉瑾納重賄欲寬之鴈執不可出為南京右都御史焦芳子黃中欲

強市其居畀通政魏納鴈不從芳父子亦怨之會瑾遣  
給事中王珣等覈遼東軍餉還奏芻粟多浥爛遂以為  
守臣罪逮鴈及繼任巡撫馬中錫鄧章前叅政冒政叅  
議方矩郎中王蓋劉繹下詔獄令其家人輸米遼東鴈  
坐輸二千石以力不辦繫遼東久之總兵官毛倫等具  
奏諸人苦狀請得所折價瑾勉從之閱三年事始竟皆  
斥為民瑾誅復官鴈前卒世宗初予卹子齊

據明史及  
李攀龍涇

王左長史張  
公墓誌銘

按山西通志張鴈成化十二年任襄陵縣知縣持  
躬廉謹牧民有方未浹期刑清訟簡吏民畏服襄

陵俗於父母喪多偷葬鴈方革之令從厚尤加意  
學校士類咸荷甄陶擢監察御史祀名宦為明史  
所不載而其軼事尤多見於孝宗實錄畧錄數條  
於後宏治十三年三月安平鎮決河既塞之後侯  
家潭口復有衝決河南按察副使張鵬議塞之十  
六年三月癸酉巡撫遼東都御史張鵬奏遼東山  
海關至開原穀陽堡該築邊牆一千百有餘里工  
程浩大所費不貲乞不為常例令巡按監察御史  
及遼海東寧道分巡官將見提并未叅官員除正  
犯死罪失機敗倫傷化例該降級者其餘雜犯以

下俱准米收贖每米一石令築塼五尺不願者出銀八錢催役兵部覆奏從之是月丙申兵部覆奏巡撫遼東都御史張鶴所言定馬制者謂遼東舊止用軍馬今鶴欲倣京營馬步兼用未知邊鎮與京營事勢同否請仍行鎮巡官議處以聞其曰清隱占曰定軍伴者請通行各邊著為例曰查流寓曰限生儒者宜悉如所請從之戶部覆奏巡撫遼東都御史張鶴所言清屯糧事謂屯田子粒未可暫免請下鶴督所屬查理撥田如邊屯俱被侵掠不可耕宜設法耕種其曰停冠帶曰嚴引限者皆

可行命如議六月辛亥分守遼陽副總兵都指揮使孫文毅坐守備不設當死巡撫都御史張鶴奏文毅雄健驍勇武藝精絕實為一時將才初亦亟思報効不意誤中賊計思得掩襲然比之擁兵自衛見賊先逃者不同輒致棄市情實可矜臣聞漢韓信坐法當斬滕公壯其貌釋之宋岳飛犯法將刑宗澤奇之使立功贖罪今遼陽事急殺此壯士誠為可惜且使功不如使過文毅繫於圜圉已三年若獲再用必有後效乞不為常例釋送總兵處聽調領軍如遇敵能斬獲首級五顆者宥其死或

立奇功則仍復其原襲祖職下兵部議謂文毅已得旨宥死發充山西平虜衛軍今鵬復薦其可用請暫免發遣仍以平虜衛軍存留本處聽調後有功如例陞賞從之八月乙卯巡撫遼東都御史張鵬以會奏廣寧都指揮張天祥等捷報失於詳審上章自劾請罷所任待罪上慰留之用心治事十七年十月甲戌初巡按山東監察御史余濂奏巡撫遼東都御史張鵬偏聽致讒縱子為惡又如撫順一所實邊關重地自成化間奏調招集軍餘千三百人補其缺伍迄今二十七年矣頃因招首屈



勤七妄奏鵠不究其實遂欲盡散諸軍臣固執不  
可乃止調勤七所領百人於汎河操守又以興作  
勞擾官軍乞徵還京師更擇堪任者代之於是自  
上䟽言兵部昔嘗移文謂屈勤七等自陳初以捐  
資募兵授冠帶總旗統其所募之卒隸於都司別  
為操練以備征調其後乃補撫順所軍伍之缺以  
他官領之宜改正仍舊前撫都御史韓重審究得  
實仍令統攝諸軍操調如故屬者汎河有警臣遂  
調勤七等剿之蓋以撫順邊情視汎河為緩而余  
濂乃批行都司云勤七等官軍恐難輕率動調其

糧賞當於本所類造支給都司其即呈巡撫總理糧儲衙門不許恣意擅變成法臣竊惟御史之於都御史名器不無上下之別今余濂批語皆以上臨下之詞且臣若果恣意變法濂自當指實劾奏豈可不顧名分有失大體將臣放歸田里仍命大臣及科道官辨別是非復斟酌巡撫巡按公會禮儀文移體式通行遵守上下其章於刑部仍命禮兵二部議濂亦上疏自辯以為臣所謂不許擅變成法者乃為都司衛所而言爾因臣劾奏仍拮据他詞欲致誣害且巡撫巡按事有關涉行令所司

轉達亦事體因襲之舊於是禮兵刑三部議今後  
巡撫巡按公會文移宜各遵禮制都御史正坐御  
史旁行都御史劄付御史御史則具呈都御史或  
有各屬相關事情應轉行者則抄按轉行其有事  
於軍馬糧餉彼此相關仍行知會余濂奏張鵠偏  
聽致讒繼子為惡未見指實張鵠所奏亦未免出  
於有意皆當有罪濂今以他事下鎮撫司獄宜候  
事完之日逮問張鵠候邊情寧日取回問罪或量  
加罰治上從之命特宥鵠罪十二月壬申巡撫遼  
東都察院右僉都御史張鵠乞致仕不允

齊字宗魯年十六從鴈之郴州歸補諸生舉宏治八年鄉試入太學正德元年鴈為瑾所構又從之獄索餽愈益謹八年授金華府同知俗故健訟齊先繩其枉者片言伏之餘逮立遣有李江者殺父妾而無毒迹齊廉得其實置於理衆稱神明再攝衡州皆有能聲嘉靖元年滿九載且行過潛見築甬道長竟縣者為白臺省罷其役無何遷涇府左長史時始封尉卒無常食齊請給廩者三年人甚德之四年年若干卒子汝椿歷泰安寧海

二王教授

據李攀龍撰墓誌銘

趙璧字潤夫成化十四年進士授刑科給事中時萬妃

家人驕橫壁奏劾謫榮經主簿天水六番高陽二招討  
讐殺不止壁奉命往諭至則帖服酬以金帛不顧宏治  
改元調無為州判官尋遷知州又遷陝西僉事行部至  
永昌金川堡遇敵千餘騎壁挺身與鬪斬首數十級奪  
馬數十匹尋卒於官朝廷嘉其功遣官以羊酒祀其家

據舊志及  
陝西通志

按成化十四年為戊戌舊志訛戊辰今正之

邊節字時中其先淮陰人元至正間節高祖朝用徙歷  
城冒王姓三世至節父寧始復邊氏寧仕至應天府治  
中節脫乳即善記誦有至性寧為舉人時居京師逆旅

疾九日不知人語傳至家節祖母萬母王皆泣曰無壯  
男子誰可往視者節時年十二應聲曰兒可往萬王嘉  
其意陽許之明日雞鳴起請治行萬王曰孺子足未造  
里門豈可上京師節伏地泣曰至親莫如父子大人客  
千里未知死生兒不行是弗子也且甘羅生十二為秦  
上卿使燕趙兒何獨不能往耶不得已使里人張某相  
之行至則寧已愈人以此奇之成化二十三年舉鄉試  
卒業太學正德元年授代州知州地多豪家強橫不服  
役節召父老與言君子野人之分使布告諸豪咸帖帖  
率教獄多繫囚皆頑慢不時入賦者節釋之與定限使

入賦賦不及限而至巡按御史某故劉瑾私人行部屏人與節語降色求賄節不與坐劾免官歸惟日飲酒不問家事郡大夫欲舉節鄉飲大賓或以其劾免難之大夫曰乃邊公所以為賢也卒舉之節修美伉爽善口辯自號介菴嘗曰吾慕蘇子卿之為人幸他日第進士必以漢卿易吾字竟不果正德六年年六十二卒子貢見

文苑傳

據邊貢先代州府君行狀

張良弼字夢徵號懲軒其先信都人元至正末有占籍縣北會清鄉者良弼高祖也祖禮敦儒行為鄉飲賓父進灤州判官良弼五歲能作字年十三聞御史梁澤較

科舉士良弼自懷卷給聞者入梁視其文甚異之竟許入鄉試而家人未之知也及父官灤州良弼遊京師學於邑人王勑極褐纓襦歲一至灤省覲成化二十二年舉於鄉宏治六年成進士觀政吏部一日尚書耿裕問諫於諸進士良弼立對數言言大約謂君子諫有三重而顯身不與焉世為上民次之君又次之體恒事經世之維也情安業輯民之庇也合德溢美君之懷也徇民而妨世諫之陋也逢君而厲民諫之蠹也表已而章君諫之賊也裕喜以為名言言於帝擢戶科給事中封駁咸關大體未幾勑視光祿寺及請內藏無所私為中官



所憚連丁父母憂十六年服除補原官十七年命勘延綏邊儲延綏本荒服前膺命者率取成牒而返良弼歷山砦搜散逸會計稱當中貴按土著例饋百金峻拒之十八年八月遷兵科右給事中十月遷禮科左給事中時武宗即位劉瑾竊柄良弼抗疏數其罪上心動責瑾瑾力搆之良弼且病強命勘宣府倉而日使衛卒至卧內假視病伺之及赴宣府復誣以姦黨榜姓名於朝與大學士劉健等五十七人皆落職正德二年三月十五日也五年瑾伏誅諸得罪者皆錄用良弼獨不與朝貴通書問十二年吏部尚書陸完疏薦起湖廣叅議提督

太和太嶽諸宮觀至襄陽下令數十條以厚風俗奠流  
亡為務太嶽故設內侍司香儀久且預宮觀事良弼曰  
安能與若輩一朝居耶以病求去抵家卒年五十八子  
延壽德府典簿

據劉天民張公行狀及  
遼貢張人子墓誌銘

周秀字公全其先長洲人祖鏗舉進士歷官都督府都  
事為讐所誣罷以薦起為山東運司經歷而沒葬歷城  
子孫遂占籍鏗生溥見文苑傳學者所稱書樵先生也  
溥三子伯程仲導季即秀少好學尹旻重之曰周元氏  
不亡矣宏治五年與程同舉於鄉計偕京師名藉甚士  
子從之游者多成名蔡天祐黃臣其尤著者選蒙城知

縣甫三月謫清豐丞時巡游多事捧檄奔走致次嘉靖  
初吏部尚書喬宇薦知上元處繁劇裕如未幾復薦為  
懷慶同知與守不和鬱鬱卒年六十三當正德初劉瑾  
竊政羅織士大夫中以慘禍海內側足而立聞秀名招  
致之或勸勿往秀笑曰是非爾所知也竟往見瑾問象  
緯曰左傳云天道遠人道邇問兵謀曰虞書云舜干朋  
於兩階七旬有苗格問術數曰有漢睦宏夏賀良儒生  
之覆轍也遂大忤其意留旬日遣歸及瑾敗或問見瑾  
何也秀曰吾不往見則禍及吾伯仲矣時程知寶埭縣  
導為嘉興知府也及秀知蒙城宦豎邱德守鳳陽大肆

誅求秀毅然弗從以狀聞上官德乃誣構之被逮下錦  
衣獄拷訊幾死已而謫清豐即墨藍田志其墓謂秀始  
見瑾跡類陳太邱云程字公度導字公慶宏治十二年  
進士

據張蕙書樵先生墓表及藍田懷慶同知周君墓誌銘

李澤歷城人正德間以舉人任保德州知州澤先官沔  
縣晉忻州知州及蒞保德興除利病不遺餘力民皆愛  
戴武宗幸山西糧餉不給澤奉部院檄召買唐家會未  
旬日得米三百石草十萬束公用充足中外賴之後以  
疾求去送者載道祀名宦

山西通志

按李澤成化二十二年舉人舊志無傳僅載其知

忻州

劉緒字繼志父環鞏縣丞以廉著緒少有志操宏治五年舉於鄉肄業國子監久之選高邑知縣俗狡詐好訟獄多積牘緒立判曲直良民便之巨盜掠鄉聚緒率衆捕其渠脅從者皆屏息時招諸生講授為文之法甚有政聲知府楊某索金不得嘆之又以言忤巡按羅某會豪民曹惠者匿罪人緒捕之急惠乃誣他事控於羅羅窮治無左驗謀於楊楊曰是何須興大獄即考以殿無弗黜矣竟奪其官正德五年也歸里以教授自給卒年五十六子天民見文苑傳曾孫亮采

據劉天民  
先考行狀

亮采字公嚴為人警敏和易萬歷十九年舉人明年成進士授鹿邑知縣縣軍民混雜稅糧隱詭吏莫能究亮采各正其籍又善決疑獄頌聲大作父愛服除補蘭陽蘭陽舊苦河患嘗漂沒民居亮采策其便鳩工築要害凡十八日而竣又革依馬及做夫之役一時裨政悉捐以上考召為戶部主事病歸築室靈巖寺菴巾道服以終老亮采嘗作歷城縣志未就工詩及書畫時稱三絕通音律以舌抵謬作韻可與絲竹合奏夢神人授以詩覺而繹之知將終乃旋里卒年六十五

據墓表及舊志

按河南通志亮采知蘭陽教士恤民鋤強矜弱築

隄修城去之日士民攀留百里不絕祀名宦靈巖  
志載其退居林下於靈巖寺掛面壁齋詩酒自放  
士大夫聞風而造廬與遊者接踵焉

徐暹字進甫父貴以庖蹕功授東華門江西鉛山所大  
使有善行暹幼嗜學貴恐致疾每讀書至夜分趨牕下  
止之暹匿燈俟父寢仍默誦不倦宏治五年舉於鄉三  
上春官不第恐親不逮養焚香籲天願以壽易祿十五  
年登第試政都察院而父卒朝夕哭謁墓側終喪如一  
日授南京工科給事中時劉瑾方竊柄暹抗疏論之械  
繫錦衣獄笞八十黜為民凡七年足不入城市瑾敗用

御史周期雍薦起山西按察司僉事晉府官以事餽金  
遲叱之出卒論如法正德八年巨寇混天王擾三晉選  
與副使張璉設方畧殲其魁民為之謠曰不發一矢賊  
乃盡死不荷殲戈賊死實多以功僉副使憂勤罹疾卒  
於官年四十九選慷慨仗節聲動朝野然性恬退被黜  
耕薄田以自給無纖毫觖望意有功輒以讓人不自伐  
人尤難之

據明一統志及  
薛梓徐公墓表

按山西通志載選為南京工科給事中奏留劉健

謝遷紫詔獄廷杖除名與此小異要之為忤劉瑾

耳



祝壽歷城人進士正德中由兩淮運同擢守黎平剛正

沉毅禁令整齊編置里甲民皆稱便賢聲上聞遷雲南

叅政

范承勳貴州通志

按祝壽字靜菴正德三年進士舊志無傳但云雲南布政而此云遷雲南叅政河南通志又載其曾為右布政使其歷官之詳不可考矣

李珙字敬之濟南舉人正德中知南皮時畿內流寇勢

張城多陷惟南皮捍禦甚備賊所至皆有內應珙燭其

姦預拘無籍假他事收禁之城以克全

畿輔通志

按李珙不見於舊志不知是縣人不再考

董昌字文隆祖正武安縣丞父瑩瑩嗜佛經而昌好詩  
書學於伯父平山知縣璽因為瑩所惡夜讀以棉衾塞  
牖盡則裘糧赴學宮重違父意也宏治十一年舉鄉試  
第六入太學久之選新河知縣值流賊至城久圯無備  
驅市民拒守賊大入厲聲索董知縣而昌涸民兵中身  
被數十創頸筋斷者三與積尸相枕三日賊退取葫蘆  
瓢包領下得不死以城陷降許州判官踰年遷定遠知  
縣尋丁父憂服闋補太湖縣多逋賦以信誠開誘之民  
竟樂輸時討寧王宸濠兵道出太湖供億餽餉倉卒能  
辦而民不知厲以勞賜銀牌彩幣擢揚州通判以童奴

受金罷嘉靖十四年年七十卒

據新天民來函  
董先生墓誌銘

江濬字子泉其先衆強人有名湖者遷於城西門外方  
水而居人謂之江家池湖子秀徙城東四十里杏園五  
傳至濬舉正德十四年鄉試嘉靖十四年授正定知縣  
縣有點少年裹石索中而假宿館人旦發其裝伴驚謂  
或寢其金易以石獄且成濬至鞠其金所從來曰舉諸  
子錢家備引子錢家無應者少年遂伏罪居四年以薦  
入為四川道監察御史從幸承天除道潯沱河檄有司  
造舟為梁覆土其上列檣扇之車駕稱便十八年巡按  
隆慶効大同總兵下吏及再有寇遂以捷聞賜金幣加

俸一級十九年巡按應天奏罷府尹洪某及奏池州知府柯某與撫臣吳狀奪俸三月以南臺御史奏解遷大同知府核晉宗人祿簿懲干謁之弊有為子甲聘女而甲沒欲以妻其子乙者女既改適訟於濟濟命以後壻之聘三十金償前壻家人服其平允後按察使奪女以與乙女遂縊死久之遷陝西按察司副使整飭洮岷邊備道一年歸又十五年為嘉靖四十三年年七十八卒

子如錦縣諸生

據李攀龍江公墓誌銘

周尚忠字本誠始祖政良元至正初以淘金官來居大清河北遂為縣人尚忠年十二補諸生為學使畢所器

異喪母不飲酒食肉者五年宏治五年歲饑鄉人貸其財不能償者尚忠勸其祖為焚券後羣盜過其廬相戒曰勿驚周先生一日逆盜於塗值雨泥淖盜扶尚忠送之行尚忠通毛詩從學者前後五六百人歷試於鄉不得舉嘉靖五年歲貢授葉縣訓導立教以持敬為主又日為士講經義越三載投牒歸十五年年七十四卒子三居卯諸生居岐字伯康嘉靖四年舉人官葉縣知縣著有文則詩則二書自序甚有理致居魯由歲貢舉嘉靖十三年順天鄉試孫六學六學子繼繼見方伎傳

王按

廷相周  
公墓碑

陳輞字子虛歷城人嘉靖五年進士任建昌推官臨事  
無大小立見隱微嘗督造圖冊工省弊消前後有司無  
能及者兩署縣篆俱著能聲

建昌府志

按舊志云輞號近山為諸生時遇呂仙後權稅維  
揚復遇比守臨洮有殲虎除妖之政及解組布衣  
角巾徒步懷刺大有古人風有遇仙傳殲虎賦其  
語不似傳體故易以建昌府志一則又按陳輞嘉  
靖丙戌進士舊志訛作正德壬戌歷仕保德府臨  
洮府知府

范瑟字孔和其先東平人元末有名思溫者避亂於縣

之天馬山因家焉五傳至瑟瑟十餘歲讀書山中二龍  
窺其牖諸生咸辟易走瑟瑟不動又嘗聞天樂作雲中諸  
生不聞也嘉靖十一年第進士改庶吉士父憂服除授  
翰林院國史編修進經筵講官十七年分校會試明年  
謫開州判官身勦巨寇遷大名口口尋擢南京戶部主  
事歷負外郎郎中二十四年入賀遷四川叅議上川南  
道駐雅州及嘉定先是都蠻之叛守臣檄兵討之輒為  
所抗瑟瑟乃身往諭以朝廷威信都蠻稽首謝請內屬如  
故二十九年再入賀拜陝西副使分巡西寧道明年征  
羌道遇暴風起東轉西瑟瑟曰羌豈舍掌吉而就紅崖乎

乃趨紅崖羌果至迎擊大敗之復戰斬其酋長九人此  
二月事也八月又戮其酋長寫爾定等羌遂平屬北虜  
傍塞遣百戶李堂齎牛酒詣其王俺答不亥曉以利害  
明日獻馬十匹謝三十一年虜更寇三川瑟將兵三千  
禦之復破其衆於紅崖斬酋數十級并殲肯騰狼台古  
事聞尚書上其功未報明年以他奏報免其官四十一

年年若干卒於家

據李攀龍范  
君墓誌銘

按陝西通志范瑟字栢峯為副使文武通材性剛  
直愛禮人士蒞任時屬番驕橫攻打堡塞烽烟四  
起諸將不能禦瑟至練兵馬運糧於西川各總堡



分伏官兵為持久之計已而乘虛自領奇兵潛據  
礮伯水溝大捷又下捕賊之令有能三人共捕斬  
一名者賞銀十兩本賊馬匹器械即給之於是無  
一生蕃敢至界者

吳聞詩號養齋嘉靖十一年進士性磊落不羈知天長  
縣飲酒賦詩不廢吏事祀於鄉

舊志

金城字邦衡嘉靖十七年進士其始授何官舊志不載  
何氏閩書載其以御史巡按福建值佛郎機夷人入漳  
州檄道海副使柯喬禦之効浯嶼把總丁桐及去任副  
使姚翔鳳受夷人金縱之入境乞正其罪同安覆鼎山

賊猖獗掠漳泉諸縣城與巡視浙福都御史朱統督官  
俘獲因條上便宜四事其一白葉坂雲嶺地方跨龍安  
二縣百餘里山林險阻實為盜藪請即其地創建二堡  
并立官舍歲令漳泉二衛守之而白葉坂尤險遠孤危  
宜移源口渡巡簡司官兵協守其二覆鼎白葉坂賊既  
殄滅其中山田可籍入官給軍耕種其三武平永定諸  
處乃守備俞大猷汎地前為漳州所調致覆鼎賊起倉  
卒失防今宜行隣省無輕調遣俾守土官各盡其職其  
四地方遇警因損軍令嚴輒不敢動調一軍而募鄉兵  
拒敵所養非所用今宜通行領兵官凡有警俱依北邊

例調官軍征勦其勇往者雖殺傷仍上功幕府若引避  
觀望即全軍無失亦治罪下兵部覆議報可後遷蘇州  
知府三十一年考績北上歸有光為人作序送之有云  
郡吏治玩傲疆場靡寧詔使旁午費數年之逋負於俗  
奢民貧災殫凋瘵之餘寬則廢上供急之則傷民命金  
公鎮以寬靜處以宏簡不震不竦能使上安而下服之

可謂難矣

據開書及  
歸震川集

薛樟字子喬事親孝嘉靖二十三年進士授山陽知縣  
擢廣東道監察御史疏劾嚴嵩遂挂冠歸嵩敗臺省屢  
徵不起所著蘭臺奏議諸書

稿志

按明史葉姦臣傳前後劾爲世蕃者謝瑜葉經童  
漢臣趙錦王宗茂何維柏王譽陳垣厲汝進沈鍊  
徐學詩楊繼盛周鈇吳時來張翀董傳策皆被譴  
經鍊用他過置之死繼盛附張經疏尾殺之他所  
不悅假遷除考察以斥者甚衆薛樟之名不見於  
史而舊志距樟時尚近不宜有誤俟考

張嵐字華嚴嘉靖二十三年進士官至山西叅議事嫡  
母曲盡其孝居喪三年不見婦女蒞官清廉居鄉醇謹  
鄉評以爲人物稱首孫廷彬羞出例金遂屢舉鄉賢不  
果子志萬歷五年進士仕至湖廣叅議

同上

洪遇歷城人進士嘉靖中知秀水先是民覲輕役多析戶寄產遇令民自疏歸併賦均而不擾歲大饑自鬻者衆不待上聞亟發廩賑之全活者無算

嘉靖通志

按稽志洪遇嘉靖二十三年進士西安府知府未載知秀水得此乃知其始官耳

殷士儋字正甫其先武定州人高祖旺德府審理正曾祖衡以永平訓導入為德莊王教授從之國濟南以勞績進審理正遂家焉既致仕王以師傅稽恩為畫像製贊使就其家存問比卒而永平諸生祀之學宮祖峻見儒林傳父汝麟見孝義傳士儋嘉靖二十六年進士選

庶吉士授檢討久之充裕王講官凡關君德治道輒危  
言激論王為動色遷右贊善進洗馬直講如故隆慶元  
年擢侍讀學士掌翰林院事進禮部右侍郎未幾改吏  
部明年春拜禮部尚書掌詹事府事其冬還理部事明  
年正月朔望日月俱食士詹疏請布德緩刑納諫節用  
飭内外臣工講求民瘼報聞以稽恩進太子太保時寒  
暑皆罷講士詹請如故事四時無輟并進講祖訓及大  
學衍義貞觀政要帝嘉納之始世宗定宗藩條例親王  
無後以兄弟及兄弟之子嗣不得以旁枝繼嘉靖末肅  
懷王薨無子其大母定王妃請以輔國將軍縉熿嗣禮

部議縉燼賈懷王從叔不可承祧詔許以將軍攝府事  
及帝卽位定王妃復請前尚書高儀執不可得忝如先  
帝令縉燼重賄中官屬宗人為奏祈必得士儋持之甚  
力帝以肅藩越在遠塞不王無以鎮之遂許縉燼嗣士  
儋又疏爭且曰肅府自甘州徙蘭州實內地即云邊郡  
宜別選郡王賢者理府事帝意堅不可奪士儋乃請封  
為郡王諸宗如縉燼者率以此令從事帝終不許故事  
郊畢舉慶成宴自世宗倦勤典禮久廢帝卽位三載猶  
未舉行士儋始考定舊儀行之是月遂以本官兼文淵  
閣大學士入閣辦事俄俺答封事成進少保改武英殿

始士儋與陳以勑高拱張居正並為裕邸講僚三人皆柄用士儋仍尚書不能無望拱素善張四維欲引共政而惡士儋不親已不為援士儋遂取中旨入閣以故怨拱及四維四維父懷鹽利為御史部永春所劾事已解他御史復及之拱四維疑出士儋指益相構御史趙應龍遂劾士儋進由太監陳洪不可以叅大政士儋再辨求去不允而拱門生都給事中韓梈復揚言脅之士儋亦疑出拱指故事給事中朔望當入閣會揖士儋面詰梈曰聞君有憾於我憾自可耳毋為他人使拱曰非禮也士儋勃然起曰若抑我我不敢怨今為四維譟訛我



而欲令彼據我座若逐陳公逐趙公復逐李公今日逐我若能常有此座耶奮臂欲毆之居正從旁阻解士儋再疏請益力乃賜道里費乘傳歸有司給廩隸如故事家居十一年卒時居正垂沒四維為政怨士儋贈太保諡文通久之改諡文莊孫啟賢以廕仕潞安府同知有清操重於時

據明史及于慎行  
殷公行狀及舊志

張存智字應貞別號春溪嘉靖二十八年舉人任昌黎知縣縣近塞稱巖邑存智至勸農繕兵甃墉甃泉招集流亡給之田畜二歲始錄之籍自占者萬餘口擢戶部

主事進郎中致仕歸

府志

韓應元字雲卿父剛見一行傳應元嘉靖四十四年進士授無錫知縣識孫繼皋於童子試仕至山西叅議以貢市功蒙賞祀於鄉

據舊志

按山西通志應元隆慶初以進士知懷仁縣整正祀典均平夫役至今猶遵其法陞評事不識與知無錫孰為先後

劉宗禹字一中為殷士儋高弟嘉靖間舉人授新城知縣遷沁州知州轄三縣農不諳種植之法宗禹循行阡陌親為指示至秋倍稔從子遷字出谷豪於詩而性剛直萬歷十年舉人授商水知縣歷刑部四川司主事擢

衛輝知府謁潞王王一見器重之時與尊酒論文時中  
官多浸漁民利民有訟之者遷置諸理民戴之如父母  
卒後崇祀鄉賢

據儒學祭典冊潘子亮所撰墓誌銘

按劉氏世榮洪武間自棗強遷於歷之堰頭鎮八  
世孫徵生宗禹其堂兄希禹生遷俱贈中憲大夫  
墓在堰頭北三里有誥命碑二

傅延者歷城人隆慶間以貢知應州性極端方政惟節  
愛辦山糧不辭利害值寇誣大有擔當祀名宦

山西通志

按畿輔通志延者以貢知祁州有豪右犯法上官  
屬出之延者指其冠曰此冠可奪此法不可奪上

官愧謝六載卒於官此及山西通志俱云歷城人而舊志不載

師必大字東津祖理昌黎典史父孟深澤教諭必大有文名隨學道楊溥試六府隆慶六年以溥薦授靈壽知縣以廉謹聞課士勸農多所振作三載告歸民為立祠樹碑還異政

完其趙採訪

按師必大不見於舊志據其家傳如此而靈壽志職官內亦不載

于鯨字子長始有于六者從東海徙歷城又六世而為芳芳見一行傳鯨其仲子也少穎異九載通左氏傳十

三補諸生第一太倉王世貞在郡召至邸試而三覆之  
謂阿憊不及也李攀龍亦命子駒與之交許邦才欲得  
快壻無當意者於路間見鯨與語曰此正吾倩矣遂以  
女妻之而薦於殷士儋嘉靖四十三年舉鄉試隆慶二  
年成進士即出士儋之門試政刑部未幾以母憂歸服  
除授刑部湖廣司主事故主事通閱郡國獄凡有可否  
悉聽尚書裁及鯨為之尚書不能易一字能聲籍籍輦  
轂間擢河南道監察御史出按正定黜貪墨撫善良吏  
民帖然以安順德富人置同姓姬前使深文論適矣鯨  
覽而笑曰於禮賁妻不知其姓則卜之何擬之重耶立

破械釋之自餘冤獄往往原情求活然竟以多平反失  
權相心至錫俸回京師行李蕭然都御史賢之為奏上  
報可復故官久之按順天順天多戚畹輕俠相通又宦  
官盛兒寄請為姦利終鯨任無敢犯者嘗行縣漁陽為  
將軍戚繼光所部畧鯨按覆軍政甚嚴繼光介胄伏謁  
鯨視之蔑如都下一時傳語謂鯨能屈大將軍矣還京  
以資久掌河南道萬歷八年監試未幾推掌京畿道畧  
無通假丰采凜然尋用臺例遷太僕少卿十年護張石  
正喪還荊州被議罷歸鯨有內行少時與宗人叅政達  
正等死代為行喪之後其事發達一無所憾遇

鮫友愛備至晚惟父憂晝夜號哭遂日委頓不進年

年如干

據刑例于公墓誌銘

劉伯縉字薦卿隆慶二年進士初任蕪縣遷戶部主事

權北新關稅溢解二萬四千餘金守杭州蠲看堂舊例

火庫公用兩定軍民大變陞陝西按察司副使潞州兵

備道公嘗自銘曰居則為端人正士出則為循吏良臣

雖矯俗太激遇物寡諧然自筮仕至宦歸無異布素縣

人咸仰其清標云弟伯綬

補志

伯綬號吾山萬歷四年舉人歷知淳山順義上元三縣

所在有聲京兆謁留璫例皆長跪伯綬獨抗禮璫重其

名緝江寇理關務以廉敏聞陞雲南楚雄知府加意撫

夷境內肅靖伯綬生平好學老而彌篤事兄尤恪謹

同上

趙應奎字子徵其先來強人明初有廼十四者徙歷城

五傳至強為應奎父強見一行傳應奎由長史掾授壩

上倉大使謹會計執票不爽釜鼓自奉取給家廩俾諸

弟轉穀歲餉之改小村鎮巡檢屬有劇賊聚松徐間上

官檄應奎捕之乃率卒往遇賊輒格鬪俘十餘人賊並

衆卒不及其十之三遂為所獲刃加於胸應奎不為動

從容為陳說利害賊竟解諸上官皆壯之而應奎忽棄

官歸年五十一卒子世卿

據李攀龍將仕郎趙公墓誌銘



此卿字象賢隆慶五年進士授南京兵部主事張居正  
當國政尚嚴世卿奏匡時五要請廣取士之額寬驛傳  
之禁省大辟緩催科而末極論言路當開言近者臺諫  
習為脂韋以希世取寵事關軍國卷舌無聲徒撫不急  
之務姑塞言責延及數年居然高踞卿貳誇耀士林矣  
然此諸人豈盡隸託無節忍負陛下哉亦有所懲而不  
敢耳如往歲傅應禎艾穆沈思孝鄒元標皆以建言遙  
竄至今與戍卒伍此中方之士所以內自顧恤寧自同  
於寒蟬也宜特發德音放還諸人使天下曉然知聖天  
子無惡直言之意則士皆慕義輸誠効忠於陛下矣居

正欲重罪之吏部尚書王國光曰罪之適成其名請為公任怨遂出為楚府左長史明年京察復坐以不謹落職歸居正死起戶部郎中出為陝西副使累遷戶部右侍郎督理倉場世卿饒心計凡所條奏酌劑盈縮軍國賴焉進戶部尚書時礦稅使四出為害江南稅監潘相至擅捕繫宗室曩時關稅所入歲四十餘萬自為稅使所奪商賈不行數年間減三之一四方雜課亦如之歲入益寡國用不支邊儲告匱而內供日繁歲增金花銀二十萬官帑日充羨世卿請復金花銀百萬故額罷續增數不許乞發內庫銀百萬及太僕馬價五十萬以濟

邊復忤旨切責世卿又請正潘相罪且偕九卿數陳其  
害皆不納世卿復言脂膏已竭閭井蕭然喪亂可虞揭  
竿非遠不及今罷之恐後將無及帝亦不省三十二年  
蘇松稅監劉成以水災請暫停米稅帝以歲額六萬米  
稅居半不當盡停令以四萬為額世卿上言鄉者既免  
米稅旋復再征已失大信於天下今誠欲免稅額之半  
而陛下不盡從豈惻隱一念貂璫尚存而陛下反漠然  
不動心乎不報其夏雷火燬祖陵明樓妖蟲蝕樹又大  
雨壞神道橋梁帝下詔咨實政世卿曰今日實政孰有  
切於罷礦稅者上疏言不可不罷者六甚痛切語多不

載帝優答之而不行至三十四年三月始詔罷礦使稅亦稍減然廣東雲南四川稅使自若吏民尤苦之雲南遂變作楊榮被戕而西北水旱時見告世卿屢請減租發賑國用並不支踰月復奏請捐內帑百萬佐軍用不從世卿遂連章求去至十五上竟不許先是福王將婚進部帑二十七萬帝猶以為少數遣中使趣之中使出諄語且劾世卿抗命世卿以為辱國疏聞於朝帝置不問至三十六年七公主下嫁宣索數至數十萬世卿引故事力爭詔減三之一且言陛下大婚止七萬長公主下嫁止十二萬今即減三之一亦二十六萬有奇乞陞

下再裁損一倣長公主例帝不得已從之福王新出府第設崇文稅店爭民利世卿亦諫阻世卿素勵清操當官盡職帝雅重之吏部缺尚書嘗使兼署推舉無所私惟楚宗人與王相訐世卿力言王非偽與沈一貫議合李廷機輔政世卿力推之廷臣遂疑世卿黨比於是給事中杜事全鄧雲霄何士晉胡忻御史蘇為霖馬孟禎等先後劾之世卿遂杜門乞去章復十餘上不報三十八年秋乃拜疏出城候命明年十月乘柴車徑去廷臣以聞帝亦不罪也家居七年卒贈太子少保子鉉據明史葉鉉字伯玉以父廢官後軍都督府都事歷太僕寺丞戶

部江西司員外郎出為河南知府調高州知府有才畧  
所至有治聲著有牧民政畧一書鉉子濬初字保一以  
祖廕仕周府左長史河南為其祖舊部政聲藉藉人口  
濬初擬作名宦錄王所為多不法濬初繩之不少假朝  
廷嘉其剛直加四品服俸擢河南知府命未下而濬初  
卒濬初子櫬桂柁櫬見隱逸傳桂柁皆諸生有文名櫬  
子恒煜喪父寢柩旁三年推產讓其兄以諸生終

傳

據趙氏家

穆深號桂陽七歲能文督學周鶴臯呼為神童萬歷二  
十年登進士時神廟靜攝不親臨軒深丹墀獨對冢宰

器之擢吏部稽勲司員外郎萊州守持三千金為壽卻  
之秉公持正為權璫所忌竟削籍歸囊篋如洗亡何卒

祀鄉賢

舊志

王見賓字懋欽濟南衛人少負英姿博覽羣書萬歷三  
年登第任南陽推官疏寃摧猾多所平反守閒封理煩  
治劇士民懷德治兵漁陽飭戎馬明賞罰中外倚重累  
遷延綏巡撫敵人畏之歸卒祀鄉賢

同上

按陝西通志王見賓任延綏巡撫沈毅多才畧每  
籌畫邊務能集思廣益知人善使故動有成勲識  
者比之韓范云

陳九疇號東華幼讀書別館有少婦月下踰垣而至九疇辭以疾嘉靖三十四年舉鄉試第二萬歷五年進士歷官山西副使絕請託禁僕從焚逋券言動不苟有古君子之風卒祀鄉賢子載春見忠烈傳

同上

周璧山東歷城人萬歷間以舉人任交城縣知縣實心愛民雅甘淡薄裁冗費墾荒田開河渠繕城堡尤加意學校於貧不能自存者時時賑給之祀名宦

山西通志

按周璧萬歷元年舉人舊志但云直隸玉田知縣有清操其與知交城先後不可考

張九賢字共甫原名九重舉鄉試後改焉其先秦強人



遷於縣東雁山數傳至九賢幼師劉勅力學萬歷四十一年第進士授絳縣知縣有惠政調汾陽報最遷刑部主事時神宗倦勤廷臣黨勢已成九賢無所依附俄退居林下與方守地殷象賢飲酒鬪詩相羊湖山以卒

朱彤

採訪

姜應科濟南人由舉人萬歷四十四年知無極縣縣有昇平橋文昌閣應科次第修舉士氣民風蒸蒸日有起色其均徭役省雜支月吉布令讀法皆培植元氣之大

者

鄭大進正定府志

按舊志選舉條僅載姜應科為邵陽知縣不識與

知無極孰為先後

楊承恩字君崇博學長厚萬歷間歲貢官平陽通判三  
視邑篆不染纖塵致政歸家徒四壁立藜藿不充人皆  
嗟嘆承恩處之晏如也知縣張鶴鳴署其第曰端僚知  
府文球造廬躬請為鄉飲大賓

補志

按舊志人物傳每傳僅數語亦有歷官甚顯而無  
傳者其選舉條下間綴一二語不能成傳姑錄於  
後云董元學萬歷庚辰進士陝西布政為人醇謹  
寡交遊亦篤行君子孟醇嘉靖辛酉舉人雲南僉  
事侏儒滑稽善攝生好亭榭耿熠萬歷丙子舉人

直隸廣平同知舉鄉飲大賓陳大務萬歷壬午舉  
人陝西延安同知五馬之第無一椽支風雨然諸  
子孫皆以才餬口四方矣袁霑嘉靖間歲貢秦府  
教授飲於鄉劉萃萬歷間歲貢壽張訓導飲於鄉  
殷汝楫任河南唐縣主簿居官不阿堂官寃逮一人命  
楫鞠之竟棄官走一縣稱嗟曾孫象賢萬歷二十四年  
舉人直隸霍山知縣精理學善音韻積書數百卷  
李寶號儒溪任河南柘城縣主簿征施五有功

按李攀龍父名寶其墓誌家傳但云以賢事德莊  
王為郎不識與此為一人否俟考

殷哲字子濬通吏河南趙府審理居官清慎處眾謙和一貧如洗眾皆賢之

秦邦彥任大興縣丞精律令性剛直縣令欲殺一人彥輒出之至相毆到京兆前京兆謂令曰秦丞強項爾須讓之竟出其人後陞經歷彥以仕途難容謝政歸學律者多師之晚歲得子夢臯為諸生有文名

孫自成武功中衛經歷習律令明術數善弈棋充例貢以從征加銜都司

范名臣京衛經歷性恬雅有文人之度

以上俱  
舊志

按舊志於選舉之後附掾史趙應奎殷汝楫李寶

殷哲秦邦彥孫自成范名臣胡士傑八人各綴以  
小傳蓋明季積重之勢在科目雖掾史有政績者  
亦不得齒於人物而國初三途並用之意亡矣今  
趙應奎已前見胡士傑見忠烈傳而殷汝楫等姑  
以移列傳之後

歷城縣志卷第三十七終